

ქართული
საზოგადოებრივი

ქართული



№ 11




მოზღლილთაჲვის. — ნო. 11



1910

მინაარსი:

I— ბავშვის სიმღერა, — ლექსი, შიმქრალისა	3
II— ციცი, — ანასტასია კრისტაფ-ხოშტარასი	4
III— ტოროლა, — (ლეკენდა) თარგმანი კარბელაშვილისა	27
IV— დიდების მადიებელი, — ეფო შანშიაშვილისა	35
V — ლევ ტოლსტოის გარდაცვალებაზე, — (ლექსი), ვაჟა-ფშაველასი	38
VI— ლევ ტოლსტოი, — ნინო ნაკაშიძისა	40
VII— ქვის გაჩენა, — ს. შარტენაშვილისა	45
VIII— სინათლე და მისი მნიშვნელობა, — ი. მოსკოვისა	52
IX— მითოლოგია, — ტროადის ომი, — ბრძოლის განახლება, ად. შაქაბერაძისა	59
X— ნარევი: — ა) შარადა, ვ. კ — ისა, — ბ) რებუსი და აღსნა	64




ნაპაღ უღი

საქმავფილო შუგნალი

ფილიალი მუქფი



ნოემბერი, 1910 წ.



ლევ ტოლსტოი



შინაარსი:

I— ბავშვის სიმღერა, — ღექსი, მიმჭრადისა	3
II— ციცი, — (მოთხრობა) ანასტასია ერისთავ-ხოშტარაძისა . . .	4
III— ტოროლა, — (ღებუნდა) თარგმანი კარბელაშვილისა	27
IV— დიდების მადიებელი, — (შემდეგი) ელო შანშიაშვილისა . . .	35
V— ლევ ტოლსტოის გარდაცვალებაზე, — (ღექსი), ვაჭა- ფშაველასა	38
VI— ლევ ტოლსტოი, — ნისო ნაკაშიძისა	40
VII— ქვის გაჩენა, — ს. ზართენაშვილისა	45
VIII— სინათლე და მისი მნიშვნელობა, — ი. მოსეშვილისა . . .	52
IX— მითოლოგია, — ტროადის ომი, — ბრძოლის განახლება, ად. მაჭაბერიძისა	59
X— ნარევი: — ა) შარადა, ვ. კ— ისა, — ბ) — რებუსი და ალსნა .	64



ბაგშვის სიმღერა.



იყვარს, მიყვარს გაზაფხული.
ველი, ტურფად მოქარგული.
ოჰ, ნაზია,
ლაშაზია

ნარ-ნარ ყვავილთ თაიგული!

**

მწვანე ველზე მიყვარს რბენა;
იქ პეპელამ იცის ფრენა;
როს ვიჭერ მათ
ხტუნვით, ლაღათ,
ფრთას შლის გულის აღმა-ფრენა.

**

მიყვარს მდელო, ბურთი, ლელო,
მწვანე მოლი უნდა ვქელო;

ეჰ, სადა ხარ,
რად გამჰრაღხარ,
გაზაფხულო საყვარელო!

**

იღარ ყვავის, ვხედავ, ია,
შკენარ ვარდს თავი დაუბრია,
ჰქროლავეს კარი,
შესაზარი,

გული ფიქრებს წაულია.

მიმჰრალი



ც ი ც ლ.

(მოთხრობა)

I



ივი, სულ-შემხუთავი ქარი სულარა-მოსხმულ მინდვრებს უწყალოდ დაჰკენსოდა, თავ-გადაკლული ეძებდა დასასვენებელ კუთხეს, იერიში მიჰქონდა შენობის კარ-სარკმლებზე, მედგრად ეხეთქებოდა, რათა შეენგრია კედლები და შიგ შექრილიყო, მაგრამ ამაოდ.

აგიზგიზებული ბუხარი წინ უდგებოდა, ყუჩს უტეხავდა, უნუგეშოდ შთენილს უკან აგდებდა. ცეცხლის ნაპერწყმები თვალის მომპრელ ზოლად ადიოდა საკვამლეში; მათი მკრთალი ნათელი ცხოველდებოდა ლამპრის შუქზე, მიმზიდველად აჩენდა ყოველსავე არსსა.

ოთახში იღვა გრძელი ტახტი; ზედ მოეკეცა მოხუცებულ დიდედას, ფუნთუშა ხელებით აბზრიალებდა თითისტარს, რომელზედაც სრიალით ეხვეოდა ყვითელი აბრეშუმის ძაფი, მის მსუქან თეთრ სახეს ჯილად დასდგომოდა პრტყელი ძველებური ჩიხტი, ლაწვებზე დაკონებული კავეები დანდობოდა ნიკაპ ქვეშ ამოტარებულ ჰაეროვან ლეჩაქის ყურსა. წარბებ ქვეშიდან იყურებოდნენ ფართე, წაბლისფერი ხშირ წამწმინანი თვალეები, რომელნიც ამ ეამად ჰხატავდნენ გაოცებას. აქა-იქ სახე დაღაროდა ცხოვრების საგრძნობ წუთებისგან, ბეჭებიც მოხრილიყო.

მოხუცებულმა დაუსვა ხელი ძაფს, ნასკვები დაუსწორა, მოხედა იქვე მოკეცილ პატარა ცხრა წლის გოგონას, რო-

მელსაც ლამპარი ახლო დაედგა, მუხლებზე გადაეშალა ზრდილი წიგნი და გულმოდგინებით ჩასცეცებოდა.

— აბა, ციცო, მერე რა იყო, შვილო?— უთხრა დიდელამ.

გაიგონა თუ არა ეს ბავშვმა, კმაყოფილებით გაიღიმა და ოთახში ნაკადულივით იწყო ჩქერა უმანკო ხმაზე რაინდულმა სიტყვებმა.

რა არ ისმოდა აქ! ყარამანის ვაეკაცობა, გარდანქეშანის სიმარღე, სარვიხურამანის შშენიერება და ქებათა ქება, მღვევების ვერაგობა, ფარმან ბარყუშის ერთგულობა და ფერიათა ფრიალი ცაში. ყველაზე მეტად ციცოს იტაცებდნენ ეს ფერიანი; თავს მათთან ერთადა გრძნობდა; გრძნობა-მორეული დრო და დრო შესწყვეტდა კითხვას, სულს მოითქვამდა, დაკვირვებით მიაჩერდებოდა დიდელას, აღმაცერად გახედავდა თითიკას, რომელიც ბუხართან ჩაცუკქულიყო, ნიკაპზე თითი მიებჯინა და ისე შესცეცებოდა ბავშვს პირში, რომ არც ერთი სიტყვა არ დასცდენოდა. მარტო ხანდისხან, როდესაც ყარამანის გასაშტერებელი მოქმედება მოთმინებას დაუკარგავდა, შესძახებდა:

— ჰო, ჰო, ჰო, რა ყოფილა ი დალოცვილი, ნეტაი თუ მართალია, ქალბატონო?

— ვაეკაცობა მართალი უნდა იყოს, ჩემო თითიკა, თუმცა ზოგ-ზოგი-კი გადამეტებულია!— უპასუხებდა ღიმილით ქეთევანი, რომელსაც თითქო სჯეროდა, მაგრამ თავმოყვარეობა ნებას არ აძლევდა გამოტეხილიყო და თითიკასთან მაინც ექვს აცხადებდა.

— ყველაფერი მართალია, თითიკა!— შესძახებდა აღტაცებული ციცო და კვლავ განაგრძობდა კითხვას.

აგერა ყარამანმა ერთხელ კიდევ მარჯვენა ხელი მარცხნივ შემოივლო, მარცხენა მარჯვნივ, ერთი საშინელი შესძახა და უსულოდ ქცეულ მღვევებისაგან თავისი ჯარი იხსნა. ციცომ დაკეცა წიგნი; ლოყები გასწითლებოდა, თვალები ცე-



ცხლებს აბნევდნენ. ქეთევანმა კმაყოფილებით შეაბზრობა თისტარი, თითიკამ წამოიწია, ანგარიშ-მიუცემლად დაიბერტყა კალთა, თითქო მოიშორა თავისი უძლურებაო... ბუხარში შეშამ გაიტყაყუნა, გარედან ქარმაც შემოჰკივლ-შემოიკვნესა... ოთახში ყოველივეს თავს დასთამაშებდა გამარჯვება, კმაყოფილება!

— თითიკა, ლოგინი გაშალე! ახლა-კი ძილის დროა! — მოუბრუნდა ქეთევანი დედაკაცს და დაუწყო ხელსაქმეს ლაგება. ციკომაც წიგნი დასდო მაგიდაზე, მიუჯდა ცეცხლს, ზარმაცად თვალი გააყოლა თითიკას ყოველ მოძრაობას.

თითიკამ დააგო ლოგინი ტახტზე, თავისთვისაც იქვე ბუხრის ახლო კუთხეში გაიშალა.

ციკომ ლოცვანი მოუტანა დიდდღას, თვითონაც გულხელი დაიკრიფა და დაიწყო ხატის წინ ლოცვა.

რამდენსამე წამს შემდეგ საბანში გახვეულობა ციკომ მალე დაიძინა. ქეთევანი კი ლოგინში ტრიალებდა, ეტყობოდა ფიქრები არ ასვენებდნენ; თითიკას თავზე საბანი წაეფარებინა და ჩუმად ბურნუთის კოლოფსა ხდიდა, რომ ძილის წინ ერთი კიდევ მოეწია, მაგრამ ხელი დაუცდა და თავსახურავი გაწკრიალდა.

— გაოხრება შენი, აჰანდე, რალასაც ჩხიკინებ! — წაიბურტყუნა გაგულისებულმა თითიკამ, საბან ქვეშიდან ხელი გამოყო და სახურავი მიითრია; დაიკმაყოფილა თუ არა სურვილი, ამანაც მაშინვე ხვრინვა ამოუშვა. ქეთევანს კი არ ეძინა, ფიქრობდა, ხვალ როგორ გაეგზავნა სოლო ცხენებით სადგურზე პავლეს მოსაყვანად. გულში ჯავრათ ჩასქროდა დღევანდელი კორიანტელი და ღმერთსა სთხოვდა, ხვალ მაინც კი დღე გამოსულიყო, სანამ ამისი მეუღლე სახლამდის მოაღწევდა. ქეთევანი ფიქრებისაგან მოიქანცა და ძილმა თავი წაართვა. ბუხარში ნაკვერჩხლებმა ფერფლი გადიკრა, მაგრამ საკმაო სითბო მაინც კიდევ გამოდიოდა ოთახისკენ.



II

მეორე დღეს ლაყვარდი ცა ღიმილით დაჰყურებდა დემიწას, რომელზედაც თოვლი ათასფერად ენთებოდა.

სარკმელში შემოსულმა მზის სხივმა გაავსო ოთახი სინათლით, ციკოს ძილი გაუქრთო, წამოიწია ზეზე და გაიღიმა.

— კიდევ თოვს, დიდდება? — იკითხა თვალების ფშვინებით.

— არა, შევილა, ზეზე, რა კარგი დღე მოდის! — უპასუხა და გასწია სარკმელზე ჩამოფარებული თეთრი მიტკლის ფარდა.

სარკმელს გარედან ხელის სისქედ გარშემო რკლად შემოხვეოდა თოვლის ფიფქი. აივნებიდან ბელურეების ქვილი-ხივილი მოისმოდა. ბავშვს მოეწონა დილა და იწყო საჩქაროდ ჩაცმა. დიდება კი დიდი ხანია თავის ლოგინშივე კითხულობდა დაუჯდომელს. თითქო ოთახში ფუსფუსებდა, იქაობას ალაგებდა.

მალე სოლომაც ამოარბინა აქაფქაფებული სამოვარი და კიკებს დაუწყო წკარუნი. ქეთევანმა და ციკომ დალიეს ჩაი; შემდეგ ქეთევანმა განკარგულება მისცა, რომ დღეს ადრე გაეკეთებინა სადილი და შემდეგ ცხენები წაეყვანა სადგურზე, რადგან ბატონი უნდა მოსულიყო. სოლო გაჩუმებული უსმენდა ბრძანებას.

დიდება ჩაუჯდა ხელ-საქმეს, ციკოს კი გული აღარ გაუჩერდა ოთახში და კარზე გამოხტა, თუმცა დიდება უკანიდან მოსძახდა, — შინ დაბრუნებულიყო.

სახლს გრძელი აივანი ჰქონდა, მთელ სოფელს გადაჰყურებდა. ციკო გადაეყუდა მოაჯირს და დაუწყო თოვლით შელესილ სახლებს ყურება.

აგერა სოლომ თავლიდან გამოიყვანა ორი ცხენი, შეკაზმა, ერთს ზურგზე მოახტა, მეორე ხელში გამოიმარყუშა და გასწია. თითქო კი სამზარეულოში დარჩა, შეუდგა სადილის მზადებას. ციკო განაგრძობდა ყურებას, რადგან აივნის ქვევით ჩასვლა აღარ ღირდა თოვლისა და სიცივის გამო. მა-



ლევ ისევ შემოვიდა ოთახში, აიღო დედოფლები, მიუღიათ ტის ბოლოს და იწყო თავის შექცევა.

— დილამშვიდობისათ!— მოისმა ამ დროს მოკრძალებული სალაში და კარებში გამოჩნდა შავებით მოსილი, მალალი, შუა ხნის ქალი, რომელსაც წინ მოუძლოდა პატარა გოგო.

— ოჰ, ანანო, მობრძანდი! როგორ აგრე გვიან-გვიან დაგვხედავ ხოლმე?— უთხრა ღიმილით ქეთევანმა სტუმარს. ეტყობოდა, მოსწყენოდა მარტოდ ყოფნა და, რა დაინახა ანანო, იამა ხმის გამკემი. ანანო მივიდა ცეცხლთან, ბუხარს ხელები მიუფიცხა და დაიწყო თითების ფშვნეტა, პატარა კატო კი მაშინვე მიტრიალდა ციკოსკენ, რომელმაც აგრედვე გაუღიმა.

ბავშვები მალე გაერთვნენ დედოფლების ფერაობაში. ანანომაც დაიხადა ფლოსტები ტახტის წინ, ავიდა ზემოდ და ქეთევანთან ცოტა მოშორებით მოიკეცა.

— ღმერთმა გიშველოს, რომ მოხვედდი! გული გაილია ზამთრისგან, ახალს რას იტყვი?— წარმოსთქვა ქეთევანმა და შეაბზრიალა თითისტარი.

— თქვენ რომ მაგასა ბრძანებთ, გენაცვალეთ, მე რაღა უნდა ვთქვა! ჩემს კდეულში რომ შემოგვხედათ, სწორედ შემობრალდებით. კიწაწი შეშა არ გაგვიჩნდა. ორივე დედაშვილი ჩავწვებოდით ლოგინში და ერთმანეთს ისე ვათბობდით. ლოგინში ყოფნა რომ მოგვწყინდებოდა, რომელსამე მეზობელს მივაშურებდით.

— მაშ, აქ რატომ არ მოდიხართ? მეც ხომ მარტოდა ვარ! არა სჯობიან, ერთად ვიყოთ?— უთხრა თანაგრძნობით ქეთევანმა.

— უი, გენაცვალეთ, როგორ უნდა შეგაწუხოთ? თავი ხომ მოგაბეზრეთ! ისეც თქვენს წყალობას ნახვარსაც არა ვლირვარ. დიდი მადლობელი გახლავარ, გუშინ რომ ერთი ურემი შეშა გამოგვგზავნათ. ძლივს ძვლები გავითბეთ. ოჰი, ისემც გაგახაროს შენის ქმრით და შვილიშვილით ღმერთმა, როგორც მე გამახარე!— დაუმატა ანანომ.



— სოფელიც ღმერთმა ააშენოს, ისიც ხელს მიმართავს. —
 კოდოს ვერ ვიტყვი, მაგრამ მაინც მეტი დრო უცეცხლოთა
 ვყრივართ ხოლმე. — განაგრძო მან, წინ გაიშალა ბოხჩა, რო-
 მელიც გადმოუდო ქეთევანმა, აარჩია საკერავეები და გულ-
 მოდგინედ შეუდგა საქმეს.

III

შუა დღემ გადაიწია, ქეთევანი მალ-მალ გადაიხედავდა
 ხოლმე სარკმელში, რათა დაენახა ეზოში ცხენები, მაგრამ
 ჯერ არსადა სჩანდნენ. მოლოდინსაც ბოლო მოეღო. მოისმა
 ხვიხვინი.

ციცომ მსწრაფლ ხელი აუშვა დედოფლებს, წამოვარდა
 და გავიდა კარზე. ქეთევანს სახეზე აღელვება დაეტყო, მარ-
 ტო ანანო წინანდელზე უფრო აიზუხა და წარბებ აფრეზი-
 ლი, გალურსული ჰკერავდა, ოთახში შემოვიდა წელში ცოტა
 მოხრილი, მაგრამ მაინც კიდევ ვაჟაკურად გამომყურე თა-
 ვადი პავლე; შეფუთვნილი იყო ბეწვ-დადებულ ქურქში და
 თავ-პირი ყაბალახით ჰქონდა შეხვეული, თვალებზე ლურჯი
 სათვალეები გაეკეთებინა.

— მოხვედი? ეგ სათვალეები რაღაა? — დაუმატა შეშფო-
 თებით ქეთევანმა და ტახტიდან ძირს ჩამოვიდა.

— ექიმმა მომცა. — უპასუხა პავლემ და ყველას ხელი
 ჩამოართვა

— თვალები როგორ გაქვს?

— ისევ ისე, როგორცა მქონდა. ხანდისხან მტკივა.
 ექიმმა მითხრა, დიდი გაფრთხილება გინდაო, ნურც სანთელზე
 წაიკითხავ, ნურც მაგარ სასმელებს დალევ და გაგივლისო. სხვა
 როგორა ხართ? — დაუმატა პავლემ და დაიწყო ქურქის ხდა.

— ვართ ასე, როგორცა გვხედავ. — უპასუხა წყნარად
 კოდმა.

კატო დედას მიეკრო და ალმაცურად გამოჰყურებდა,
 თუ სოლო როგორ ალაგებდა ხურჯინიდან სხვა და სხვა ნივ-



თებს. აგერა ამოიღო ორი წყვილი დოში, ზურგიველი შაქარი, მას თან მოჰყვა პატარა ქალაღღში შეხვეული რაღაც.

— ეგ ციკოს ფებსაცმელებია, აბა, გოგონი, გასინჯე, როგორ მოგოვია, — წარმოსთქვა პავლემ და ქალაღღიდან გამოსხნა ხევა და სხვა ფერის ძაფებით მოქარგული ფებსაცმელები. ციკოს სახე აენტო აღტაცებისაგან, უცბად გამოსტაცა ფებსაცმელები და გაიქცა მეორე ოთახში ჩასაცმელად, თან გული უშიგძიგებდა, ვაი თუ კარგად ვერ მომივიდესო.

— შენც საკაბე მოგიტანე, თუ გამოგადგება, — დაურთო პავლემ და ცოლს გადაუღო მიხაკის ფერი შალი. ქეთევანმა გადაშალა და გულში იამა. მოტანას უფრო ყურადღება მიაქცია, ვიდრე სავაჭროს ღირსებას. შეეძლო თვითონ უფრო ძვირფასი აერჩია, მაგრამ სულ სხვა მნიშვნელობა ჰქონდა ამ საჩუქარს. მალე მაგიდა გაიღესო მოტანილებით. ეტყობოდა, პავლეს პირის პატივი უყვარდა.

— ეს კარგა ხანს გვეყოფა, თუ გამოვიზოგავთ, — სთქვა პავლემ და ხუთი — ექვსიოდე ყუთი ხიზილალისა ამოიღო.

— გეთაყვა, სოლო, დროზე დააბინავე ყველა ეს მარანში და სუფრაც გაშალე. პავლემ წაღები დაიხადა და ტახტზე მოიკეცა.

— ნათლიდედ, თქვენ როგორღა ხართ? — მოუბრუნდა ანანოს, რომელიც გაწითლდა, მორცხვად თავი ძირს დახარა და ჩილაპარაკა.

— დიდ მადლობას მოგახსენებთ, გახლავართ, როგორც შეეფერება ჩვენს გაკირებას. ამ დროს შემოვარდა ციკო ბაკა-ბუკით.

— შეხე, პაპა, რა მშვენიერად გამეწყო ფეხებზე... ეს პრილა რაღა აქვს?

— ეგ ლაიკია, შეიღო, ხარბმა საგანგებოდ აარჩია, უთხარი, ახალი „მოდნისა“ მომეცი მეთქი.

კატო ხარბად უყურებდა ციკოს და გულში „შენატროდა, რომ ის ისეთი ბედნიერი იყო. ანანომ გადახედა ორივე

ბავშვებს და მძიმედ ამოიოხრა. ქეთევანს არ გამოჰაჩნებია
 ფარული სევდა, აღერსით გაუღიმა კატოს, თითქო უსიტყვოდ
 ჰპირდებოდა: მოიცა, არც შენ გაგისტუმრებ დაუკმაყოფი-
 ლებელსაო. პავლეს ბევრი ლაპარაკი არ უყვარდა, უფრო
 მეტი ხანი გაჩუმებული იჯდა ხოლმე ტახტზე წინდების ამარა
 და თავისთვის ღიღინებდა.

— ჯა, რას გაჩუმდი, ქალაქიდან მოდიხარ და დავიჯერო
 არა იცი-რა? — ჰკითხა ღიმილით ცოლმა.

— ძალიან დავიღალე, ამ ოხერმა ცხენმა სულ მაჯანჯღალა,
 ეტყობა გადაჩვეულა სიარულს. შენ, სოლო, მგონი, სულ
 ბოსელში გება და კარზე არ გაგიყვანია! — მოუბრუნდა თეთრ
 ჩოხაში გამოკრულ სოლოს, რომელიც სუფრასა შლიდა.

— თქვენი რისხვა არა მქონდეს, ბატონო, დღეში ორ-
 ჯელ ჩამყავდა წყალზე. უპასუხა და დააწყო სუფრაზე მშვე-
 ნიერი თეთრი კაკალა პურები.

— მამა გიცხონდება, ჩქარა მოიტა და! — მიატანა პავლემ.
 მონატრებოდა სოფლის გემრიელი უხვი სუფრა და ახლა
 ხარბად უყურებდა სანოვაგეს.

— დაილოცა სოფელი! სოფლის ჰირიმე! რა არის ქა-
 ლაქი?.. მკამელი და ამისთანავე მშიერი! — სთქვა პავლემ, პირ-
 ჯვარი დაიწერა და გადატეხა ცხელი პური, რომელსაც ოშნი-
 ვარი ავარდა...

— იჲ! იჲ!.. აცხონა ამის გამომცხოვბის მამა! — სოლომაც
 საწინე შემოარბენია. სუფრის თავში იჯდა ქეთევანი, შემდეგ
 ციცო, ანანო, და კატო, სულ ბოლოს თვითონ პავლეს მოე-
 კცა. ანანო კრძალვით იღებდა საკმელს, კატოს ხომ შიშით
 ლუკმა ყელში უჩერდებოდა. ციცო კი თამამად იყურებოდა
 და გემრიელად ილუკმებოდა.

სადილსაც მალე მოელო ბოლო, პავლე იქვე მხართეძოზე
 წამოწვა, მაგრამ დაღალვამ და ძილმა დასძალა და გავიდა
 მეორე ოთახში, სადაც ბუხარში ცეცხლი გრიანდებდა და
 ტახტზედაც საბან-ბალიში ელოდა.

IV

თავადი პავლე პარპაშვილი ოჯახში ერთხელვე შემოდებულ წეს-ჩვეულებას არა სცვლიდა, ცდილობდა არ დაერღვია თავის სახლში დამყარებული ბრძანებლობა. თუმცა სამოც წლამდის მიხწეულიყო, მაგრამ ახლანდელ ახალგაზრდებს უკან არ ჩამორჩებოდა არაფერში, შეძლება კარგი ჰქონდა და არას იკლებდა. პავლესა და ქეთევანს ერთად ერთი ქალის მეტი არ გააჩნდათ. ეს იყო ციცოს დედა, რომელიც პირველ ლოგინობასვე თან გადაჰყოლოდა, მისი ქმარიც მეორე წელს მოკვდა. დარჩათ პაპასა და დიდუდას ობოლი, რავდენისამე დღის ციცო, რომელიც გასაზრდელად აიყვანეს. ქეთევანი იმედით შეჰყურებდა პატარა ციცოს.

— იქნება ამისმა ნიკმა და კარგმა იდამიანობამ რაიმე ნუგეში მომიტანოს ცხოვრებაშიო, — ფიქრობდა და ეფერებოდა.

დიდი წვალება და შურუნველობა დაატყდა ქეთევანს თავზე, ვიდრე რავდენისამე დღის ციცოს ცხრა წლამდის მოჰყრიდა. ს-ფლის დედაკაცები რიგ-რიგით აქმევდნენ ძუძუს, სანამ საკუთარი ძიძა არ მოუყვანა. ბევრჯელ მივარდნილა სიკვდილის პირამდე ბავშვი, მაგრამ ქეთევანს თავისის მოვლით: თავგანწირულებით გამოუბრუნებია.

ქეთევანს ღიმილი გადაჰკრავდა ხოლმე, როდესაც წარმოიდგენდა ციცოს დაქალებას; აიტაცებდა პატარას, გულში ჩაიკრავდა, კრემლებ-მორეული ჩაჰკონიდა, ჩასჩურჩულებდა:

— ნეტაი რა მოგელის ცხოვრებაში, შვილო? ძუძუ ნაწყენი, მისუსტებული ბავშვი გამოყოფდა პაწაწა თათს და ციცუნისავით დაიკნაველებდა.

— ციცო, ციცო, შე, საბრალო! — მიეფერებოდა დიდუდაც.

თითქო მოეწონა ეს სახელწოდებამ და სიდონიათ მონათლული ბავშვი სახლში მყოფებისთვის გარდიქცა პატარა ციცოდ, რომელიც მას დღეს აქედ იზრდებოდა მოხუცებულების ფარეზობაში.



პაპა, როცა კი სახლში იყო, ძალიან ეფერებოდა, შავ-რამ იშვიათად ბრუნდებოდა სახლში. მოიგონებდა რაიმე მიზეზს, საქმეებს გაიჩენდა და გასწევდა ქალაქში, სადაც თვის-თვეობამდის ატარებდა. პურ-მარილით განთქმულმა პავლემ მიხურა სახლის კარები და აღარავის იწვევდა. სამაგიეროდ, უდილობდა მუდამ კარზე ყოფილიყო და კარზედვე გამას-პინძლებოდა თავის კარგ ნაცნობ—ამხანაგებს. ამისი ყარაბა-ლული სიმღერა და თარი ზღაპრად იყო დარჩენილი, მაგრამ რაც ქალი მოუკვდა, ცოტა ხანს ხელი უშვა ყველაფერს მწუხარებისგან დაძლეულმა. მერე კი თანდათან გაუმკლავდა სასოწარკვეთილებას.

პავლემ ნელნელა ჩამოიშორა საშინელი სევდა.

მოკვდება, თავს მოუკვდება—

ცოცხალი დონიერააო.

იტყოდნენ ხოლმე, როდესაც დაინახავდნენ ყურთმაჯებ გაშლილს, დარბაზში თითის წვერებზე შემდგარ პავლეს და მოისმენდნენ მის ვაჟკაცურ ხმაზე შემოძახილ ჩარგას.

წუთი სოფლის სტუმრები ვართ,

ჩვენ წავაღთ და სხვა დარჩება,

კაი ვსვათ და კაი ვჭამოთ...

ამის შეტია რა შეკვრება?!.

ამით ანუგეშებდა თავს პავლე, მაგრამ სახლში რომ ბრუნდებოდა, თითქო მიძინებული სევდა ისევ აეშლებოდა, აიღებდა თარს და მის ნაზ, პაეროვან სიმებს გააყოლებდა გულის ბოლმებს.

პავლე ოჯახსაც საგანგებოდ განაგებდა. სასიამოვნო სა-ნახავი იყო პავლეს მარანი: კუთხე არ დარჩენილიყო, რომ სავსე არ ყოფილიყო სხვა და სხვა სანოვაგით. ღვინით სავსე ქვევრები, სხვა და სხვა მღუფუები, პირამდის გალიცლიცებული ქურკლები, შაშხები, ხილეულიობა, ბოსტნეულობა, ერთის სიტყვით, დოვლათი სდულდა და გადმოდიოდა.



პავლე ქეთევანს არა რევდა საქმეში, ყველაფერს თონ აკეთებდა, ცოლს აივან ქვევით არ უშვებდა, მისი საქმე იყო მარტო ციკოს აღზრდა, საკერავი და აბრეშუმის რთვა განიერ ტახტზე.

ქეთევანის ასპარეზს ეს ტახტი შეადგენდა და მის გარედ ხელი არ მიუწვდებოდა.

— რა შენი საქმეა, ქალო, საკუქნაოში სიარული?... თითქო რისთვისა გყავს? იმას ვერ ჩაგზავნი? — ეტყოდა ცოლს პავლე.

მამულის შემოსავალ-გასავალიც ხომ, რასაკვირველია, მარტო პავლემ და მისმა მოურავმა იცოდნენ.

პავლე ხანდისხან მისცემდა ხოლმე ქეთევანს ფულს სხვა და სხვა საჭიროებისთვის, დანაარჩენს-კი, როგორც თვითონ ამბობდა, „პრიკაზში“ ეზიდებოდა. ქეთევანი მზად იყო, ეს მოცემული ხარჯიც უკანვე დაებრუნებინა, ოღონდ-კი პავლეს მამული გაეწმინდა ვალისაგან. მარტო დარისპან მოურავი უღვაშებში იცინოდა, როდესაც ქეთევანი დაიწყებდა მასთან ლაპარაკს, მალე გავითავისუფლებთ მამულს ვალები-საგანაო.

— გაიგონე, დედაკაცო, ჩვენ ბატონს სულ წაუგია ბან-ქოში ის ასი თუმანი შალბაშის ფული და კიდევ ზედ ორმოცი თუმანიც ვალი დაუდვია, რომ არა ჰყოფნია ქეიფებში, — ეუბნებოდა დარისპანი თავის ცოლს სწორედ მაშინ, როდესაც პავლე სახლში იჯდა და თარის სიმებს აწკრიბებდა.

ქეთევანმა ციკოს წიგნის კითხვა დააწყებინა და სამ წელიწადში მშვენიერად კითხულობდა ყველა ქართულ ნაწერს. პაპასაც მოჰქონდა სხვა და სხვა საყურადღებო შინაარსიანი წიგნები.

ციკო უმეტეს დროს ატარებდა დიდუდასთან, რომელიც არავისთან არ უშვებდა. ოღონდ ბავშვს კარზე არ გაეწია და სახლში ყოველ მხრივ აკმაყოფილებდა მის სურვილს, მაგრამ ციკოს გული გარედ მიჰფრინავდა, თუქცა-კი უჯერებ-

და დიდდეს და სახლში რჩებოდა. ზამთარი ზაფხულსა მსგავსად
ლიდა, ზაფხული ზამთარს, ქეთევანი და პავლე თანდათან
ბერდებოდნენ, ციცი იზრდებოდა.

V

მალე მზეც მიიმალა და სუსხმა იმატა. ბუხარში კვლავ
აპრილოდა ცეცხლი.

ქეთევანი და ანანო ისევ განაგრძობდნენ საქმეს. სარ-
კმლებზე ფარდებიც ჩამოაფარეს, გაისმა ოთახში ქიქების
წყრიალი: სალამოს ჩაისთვის ემზადებოდნენ. ანანომ შეახვია
ბოხჩა და მოხედა პატარა კატოს, რომელიც ამ დროს ეჩურ-
ჩულებოდა ციციას.

— კატო, შეილო, წავიდეთ, თორემ მერე გზას ველარ-
კი გავიგნებთ. კატოს ამ სიტყვებზე რაღაც ნალველი დაეტყო.

— რა მიგაჩქარებს? ცოტა მოიცადე. — უთხრა ქეთევანმა,
გადმოვიდა ტახტიდან და შეალო კარი მომცრო ოთახში, სა-
დაც სხვა და სხვა ავეჯი ჰქონდათ შენახული.

ქეთევანმა თავი ახადა თეთრ ყუთს და დაუწყო რაღა-
ცეებს ძებნა. რავდენისამე წუთის შემდეგ გამოიტანა გამო-
ხვეული. ეტყობოდა ციციასი უნდა ყოფილიყო. ანანომ დაი-
ნახა თუ არა, სიხარბისაგან თვალეები გაუგანიერდა, ეჩქარე-
ბოდა ხელი წაეელო, რომ დროზე თავის საკუთრებად გაე-
ხადა, მაგრამ თავი შეიმაგრა.

— იქნება კატოსთვის გამოგადგეს. — ქეთევანმა გადაუ-
წყო ორი-სამი ხელი ტანისამოსი. გატკრციალეული დედა
და შვილი კმაყოფილებით გაემართნენ თავიანთ ლარებ ციცი
კედლებიან ქდეულისკენ.

ციცი ისევ მარტო დარჩა და მოიწყინა. ქეთევანიც ფი-
ქრებმა წაილო. გარედან ისევ მოისმა ქარის ზუზუნი.

— შენს მგზავრობას პატივი სცა ამინდმა და ახლა კი ისევ
ისე შეირია, — უთხრა ქეთევანმა ქმარს, რომელიც ძილით გა-
მძღარი დაწითლებულის თვალეებით შემოვიდა ოთახში.



— თავში იცეს... ახლა რაღას დაჰაკლებს?... ტელში გზაში ყოფნა-კი ძნელი იქნებოდა.—უპასუხა პავლემ, ზარმაცად დაამთქნარა, ცეცხლს მიუჯდა და თვალები გააყოლა ნაპერწკლებს.

— ჩემი ბიძაშვილი როსტომი რაღას შვრება? ან ძალუა ნატალია?—იკითხა პავლემ კარგა ხნის სიჩუმის შემდეგ.

— რა უშავთ? ამ ორის დღის წინად ნატალია იყო აქ, როსტომი კი თავისებურად კრუხივითა ზის სახლში და ოჯახს თავს დასტრიალებს. ნეტაი იმას! ძალუა ნატალია დიდი გახარებულია, ამ მაისში ათავეებს თურმე სწავლას იმისი ელენე.

— მართლა?—შესძახა გაოცებულმა პავლემ და ჯოხი შეუჩიჩხინა ბუხარს.

— ე ჩემი ციკო უნდა მივაბარო ელენეს, ეგება რუსული წერა-კითხვა მაინც ასწავლოს.

— ძალიან კარგს იზამ, მე და ჩემმა ღმერთმა, ციკოს ელენეს სკოლაც ეყოფა. მეტი რა საჭიროა.—უპასუხა პავლემ.

ციკო ყურს უგდებდა ამით ლაპარაკს და გულში უხაროდა, რომ ამ ზაფხულს ელენესთან დაიწყებდა სიარულს. ციკოს დიდი ხანია შეეყარებოდა მისი ლურჯი თვალები; ელენეს წრფელი სახე ანდამატივით იზიდავდა ციკოს. შორს წასვლა, მოშორება დიდება და პაპასი თვითონ ციკოსაც ეზარებოდა.

— განა ელენე-კი ვერ ასწავლის ყველაფერს, დიდებას-თანაც იქნება და ციკო პატარა კატოსაც გაუზიარებს თავის ცოდნას.

ასე ფიქრობდა ციკო და თვალები კმაყოფილებით უბრწყინავდა.

— ოპ, როდის უნდა გავიდეს ეს ოხერი ზამთარი? შორს არის, შორს ზაფხული! დღეს ხომ ოცი ქრისტეშობისთვეა, მაისამდის კი ჯერ ბევრი დროა! ოთხის დღის უკან შობა უნდა გათენდეს!

ციკოს ძალიან მოსწონდა ეს დღესასწაული. ახალწელს ღამეს ციკო თეთრის თვალით ათენებდა, რადგან სახლში ამზადებდნენ გოზინაყს, ალვას და მრავალ სხვა და სხვა ტკბილეულობას. მთელი სოფელი ცოცხლდებოდა, მათთან ერთად ციკოც.

— მაინც ზაფხული სჯობიან ზამთარს! რა საყვარლად მოიფინება ხოლმე ველ-მინდორის სხვადა სხვა კვკლუცებით!.. პაგრამ... მაგრამ... დიდება არსად უშვებს... წაიქცევით, ტანისამოსს დაიხვეო, ხარ-კამეჩი გერჩისო. ათასი მიზეზი წინ ელობება. ციკო ჯერ კიდევ პატარაა, რომ ყველა ამ დამაბრკოლებელ მიზეზებს არ შეუშინდეს და გაუმკლავდეს. მაგრამ არა უშავს რა. ახლა ელენე მოვა, მისს მზრუნველობის ქვეშ იქნება ციკო და დიდებაც ელენეს ხათრით აღარსად დაუშლის წასვლას. ელენეკი ისეთი კეთილია! იმისი პატივის ცემა ყველასა აქვს. მანამ დიდიც გაიზრდება და შეიქმნება თავისუფალი! ამ ფიქრების მორევში დასცურავდა ციკო; ველარ ამჩნევდა, დრო როგორ მიდიოდა და ყველა საძილედ ემზადებოდა.

VI

სოფელი სიცივეს ყურს არ უგდებდა და ემზადებოდა სახვალიოდ დღესასწაულისათვის. სალორეებიდან მოისმობდა ლორების ჭყვიტინი. ყველა ვისაც-კი წლითი-წლობამდის სველი ლუკმა არ ეგვმა, სახვალიოდ იმზადებდნენ პირის გასაგემრიელებელს. პავლეს ოჯახშიაც დიდი ფაცი-ფუცი იყო. დედაკაცებს თავი მოეყარათ სათონეში და ცხელ-ცხელ ლავაშებს იღებდნენ. სოლოს დაეკლა დიდი კერატი, ლანგარზე დაედო და აკეთებდა.

— აბა, მამა გიცხონდება, მაგას დროზე მორჩი, და, კუთხეში რომ სამ კოკიანი ზედაზე არის, ფრთხილად მოხადე! ვინძლო მიწა არ ჩაგიცვივდეს.— ეუბნებოდა პავლე და ტრიალებდა სამზარეულოში, ყველაფერს ათვალიერებდა.

— ხვალ კაცები ქათმებს შოიტანენ და იმათ^{საქართველოში} ღებლად ჭურჭელი მოამზადე.

— ბატონი ბრძანდებით... — მორჩილებით უპასუხა სოლომ და ხელი ააჩქარა; ეხმარებოდა სტუმრად შემოსული მეზობლის ბიჭი. ზევით სართულში დიდგდა გაფაციცებით ჰკერავდა ციკოს ახალ კაბას, რომ სახვალიოდ მოესწრო.

მეორე დღეს, ჯერ არ იყო ნანათლი, ქეთევანი და პავლე ჩვეულებრივ ფეხზე იდგნენ. ციკომაც ადრე აიწია. საყდრის ზარი დაირეკა თუ არა, ხალხმა დაიწყო საყდრისკენ დენა. მორთულ-მოკაზმულ ლეჩაქ-ყურ გადაგდებულ ქალებს დაეკარწახებინათ და მისდევდნენ თოვლზე გაყვანილ ბილიკს. ურემიც მოკრიალდა სახლის წინ, პავლემ უშველა ქეთევანს ურემში ჩაჯდომა და გვერდით ციკო მოუსვა. ეკლესია შორს არ იყო და ურემში მალე მიატანა, იმას მოეწია მეორეც, რომელშიაც ისხდნენ კნენა ნატალია და როსტომი. საყდარში შეიქნა ჭურჩული, მიწვე-მოწვევა, პავლე გადავიდა საწიგნობელის წინ და ქეთევანი კი გაჩერდა კარების ახლო კუთხეში და წინ დაიყენა ციკო. როსტომში და ნატალიამ ხატებ წინ დაიქირეს ადგილი. მლოცველების თვალები ხშირად უნებურად გადიოდნენ გვერდით მდგარ მეზობელზე და დაკვირვებით არჩევდნენ. მრავალი ახალი ტანისამოსი უსიტყვოთ ეკამათებოდა ერთი მეორეს. ციკო, პირის ფერ კაბაში გამოწყობილი, გრძნობდა, რომ მორთულობით ყველას სქარბობდა, თუმცა გარედან არა სჩანდა და სათბუნებელში შეფუთვნილი იყო.

კატო და ანანოც აქვე იდგნენ ახლო. კატოც ციკოს ნაცვამ კაბით თავს იწონებდა. წირვა გამოვიდა. მღვდელმა ხალხი ჯვარით დაამწყალობა, ხალხმა დაიწყო საყდრიდან გამოსვლა.

— მრავალ შობა დღეს დაესწართ!

— თქვენც დაესწართ!..

ულოცავდნენ ერთმანეთს როსტომი და პავლე... ქეთევან და ნატალია, ხალხი ამათ თავს უკრავდა და მიდიოდა თავის გზაზე.

დღევანდელ დღეს ყველა ელოდა თავის ოჯახზე დასასწავლის მზიარულად გატარებას და მიესწრაფებოდა.

ის იყო, პავლე და ქეთევანი ამოვიდნენ თუ არა სახლის კიბეზე, უკან მოჰყვა შემოსილი მამა იოსები ჯვარით ხელში. პავლემ მაშინვე მიიწვია ოთახში.

— შობამან შენმან, ქრისტე ღმერთო, აღმოუბრწყინასოფელსა ნათელი! — გაისმა ოთახში იოსების ხმა.

— ვაცოცხლოთ, ვადღეგრძელოთ, ბატონო! — ამ სიტყვებით კარი შემოაღო ზონჩით ხელში ნინიკამ, რომელსაც სახე აღეწოდა და ძლივს ფეხზე იდგა.

მღვდელი მოლოცვის შემდეგ მალე წავიდა, ნინიკას მოჰყვა მეორე გლეხი, მესამე, მეოთხე...

— ავაშენათ ღმერთმა!.. — უპასუხა თავ-გამოდებით პავლემ და თანაც თვალები დააცეცა მსუქან დედლებს და ბოთლებით არაყს.

— ქვევით ჩადით!.. — დაუმატა მოწყალედ.

გლეხები მიხედნენ, რასაც ნიშნავდა ეს ქვევით ჩასვლა და მაშინვე კმაყოფილებით გატრიალდნენ; თავს იყრიდნენ ბოსელში, სადაც ელოდათ უხვი სუფრა.

— მოგვილოცავს, ქალბატონო, ღმერთმა ქმარ-შვილი გიცოცხლოთ! — ოთახში შემოვიდა რამდენიმე დედაკაცი, მათ შორის ანანო და კატოც. დედაკაცებსაც თვალები უციმციმებდათ და პირზე ღიმილ-სიცილი არ შორდებოდათ.

ქეთევანი მიეგება და სათითაოდ გადაჰკოცნა. პავლემ გასწია ქვევით ბოსლისკენ, ციკოსა და კატოს ილტაცებას საზღვარი არა ჰქონდა. მალე ბოსლიდან მოისმა „მრავალყამიერი“. ოთახშიაც ორ პირად გაიშალა სუფრა, რომელსაც ქალები შემოუსხდნენ.

— მართა, რასა პატარძლობ? რატომ არისა სკამ? ანანო, ღვინო დაუსხი ნინოს!.. — ღიმილით უმასპინძლდებოდა ქეთევანი ქალებს. ესენიც მზიარულად შეექცეოდნენ სადილს.



VII

ზამთარი გავიდა. გულის შეშალონებელი გრძელი ღამეები დამოკლდა. მარტმა თოვლი წყლად აქცია, აპრილმა მინდვრები ამწვანა, შიგ ჩააქსოვა სხვა და სხვა კეკლუცი ყვავილები, რომელნიც მომზივლელად ირხეოდნენ. ხალხი გამოიშალა კარზე, ხარბად შეისუნთქა მაცოცხლებელი გამკვირვალო ჰაერი, გაისმა ათას ნაირი ხმები. გაღალტებული ფრინველები სრიალებდნენ, ფრენდნენ, მიილტვოდნენ შორს სადღაც. თავისუფლება, სიფართოვე და სიმჩატე მოჰქროდა ყოველ მხრივ.

სოფელსაც სამხატვრო ელფერი დასდებოდა. მწვანე მცენარეებში გახვეული შენობები დიდებულად იყურებოდა შორიდან. ბაღებს მოსდებოდა ხალხი, მზის ბრწყინვალე სხივებზე აელვარებდნენ თოხებს. წკრიალებდა რკინა, მას თან მოსდევდა სვედიანი ლილინი.

თავად პავლეს გრძელი აივანი ავსილი იყო მზის სხივებით, სარკმლები დაელოთ და მათში თავისუფლად დაფრიალობდა წმინდა ჰაერი, რომელსაც ახალი სიცოცხლე შეჰქონდა ოთახებში.

სახლში მყოფნი დღის შესაფერად მორთულიყვნენ, ქეთევან და ციკო გამოწყობილიყვნენ საზაფხულო სუბუქ ტანისამოსში.

ციკო აღტაცებული დაბტოდა აივანზე და მალ-მალ იხედებოდა შორს ცნობისმოყვარეობით. ქეთევანი ჩვეულებრივ ტახტზე იჯდა, გარედ არაფერი არ იწვევდა, თითქო ყოველთავე უკვე მობეზრებოდა, ციკო-კი გაოცებული შეჰყურებდა ბუნების სიღიადე-საკვირველებას. თითქო ცაში ჰფრენდა, გადადიოდა ფერიათა სამფლობელოში. წუთს ოთახში შემოვარდებოდა, მიმოიხედავდა, მისი წარბები მოიღუშებოდა. ციკო არ კმაყოფილდებოდა სამის პატარა ოთახით, აქ ყოველთავე დაძველებული იყო, თვითეული ავეჯი, რომელსაც ახლა ხედავს ციკო, ამავე წეს-რიგით დახვედრია პირველსავე დღეს, როდესაც ქვეყნად გაჩნდა. თვალებმა მათით გაიგეს საგნების მნიშვნელობა,



ხელებმა — შეხება. ციკო-კი დღეს ათის წლისაა და მოსწონს ერთი და იგივე. სხვა სანახავი უნდა, მობეზრდა ეს მომცრო შკაფი, ან მაგიდა, რომელზედაც გადაფარებულია ქეთევანისგან მოქსოვილი თეთრი სუფრა, ან გრძელი ტახტი. მეორე ოთახშიაც ძველი, პირგადაძენძილი დივანი დაღვრემილი შეჰყურებს ციკოს. მისი მსგავსი სავარძლები და ტახტი ახალს არას ეუბნება. ციკო საჩქაროდ გარბის ისევ კარზე და ხარბად ისუნთქავს ჰაერს. ხანდისხან ჩაირბენს კიბეზე და შეიხედავს სამზარეულოში. იქ სოლო დგას ცეცხლა პირას და სადილს ამზადებს.

სოლოს ძალიან უყვარს ციკო, რადგან იმისი გავრდილია, თვითონ ციკომაც იცის და უნებიერდება. ხარბად შეჰყურებს ხელებში, როდესაც სოლო ტაფაში ბრაწავს კარტოფილს, ან ვარისს ხობბავს. რადენიმე წუთი და ციკოს კბილებში გააქვს ხრამა-ხრუმი გემრიელ სასუნსავს. სოლო გადმოუბრუნებს როდინს და მოუბრუნდება.

— აბა ციკო, ამ როდინზე დაჯექი და ყარამანის ამბავი მიაშბე. ესეც უჯერებს, გულდასმით მოუყვება სოლოს, სახე უცოცხლდება და კეთილ თვალეებში გაცემა ებატება. ციკო გათავების შემდეგაც საჩუქრად იღებს სოლოსგან ჩურჩხელებს, ან ვაშლს, რომელიც სოლოს გამოუღვეველად აქვს მისთვის შენახული. რომ მოსწყინდება სოლოსთან, ციკო შერბის სახაბაზოში. იქ თითქო წამოჩოქილია თონეზე, ხანდისხან ფეხის თითებით ეკიდება და ისე სწვდება გავარვარებულ ცეცხლს და ციკოს ცხვირში უღიტინებს ახალ ნამცხვარის სუნს, თითქოც წაუტებავს საუკეთესო პურს, ან ლავაშს და ციკოც მადიანად ილუკმება. სახაბაზოდან გოგონა გარბის ბაღში, რომელიც იქვე სახლის წინ გაქიმულა. აქ ფეხქვეშ ეგება რბილად მწვანე მოლი, ყვავილით შეფოთქილი ხეები ნაზად თავს უხრიან.

— სტეფანე, მაგას რათა თოხნი? — ეკითხება მუშას ციკო.

— ეს კიტრია, ბატონიშვილო, ეს სიმინდი. — ეუბნება სტეფანე და განაგრძობს ღიღინით მუშაობს.



— ციკო, ციკო, მანდ სად ჩასულხარ, ქალო ^{ქალო მისი} მის ამ დროს დახილი. ბავშვი იხედება, ქეთევანი დგას აივანზე და ხელს უქნევს. ციკოს ეძნელება მშვენიერ ბუნების მოშორება, მაგრამ მეტი ღონე არ არი, უნდა დაბრუნდეს და ესეც ნელ-ნელა მოდის; თან გული ევსება საყვედურით, მზად არის ცრემლები გადმოღვაროს.

ციკო ხმას არა სცემს დიდედას და დაღონებული გაიყურება აივნიდან. აგერა გზაზე გამოჩნდა ეტლი, ციკომ იცნო, რომ ეს ბიძია როსტომისაა, სადგურზე გზავნიდნენ. წუთს ციკოს თვალები გაუბრწყინდა და გახარებულმა დაპკრა ტაში და მოუბრუნდა დიდედას.

— ეტლი მიაქვთ, ეტლი!

— ჰო, შეილო, დღეს სადილად მიწვეულები ვართ ძალუა ნატალიასგან, ელენეს მოელიან, — უპასუხა ქეთევანმა და ოთახში შებრუნდა. შუადღე მოვიდა, წასვლის დრო იყო. ციკომ ჩაიცვა ჩითის ახალი კაბა და გვერდით ამოუდგა დიდედას. ქეთევან სისრულისაგან ძლივს მიდიოდა, მალ-მალ ისვენებდა, ამათ უკან მიჰყვებოდა დიდის სახრით სოლო, რომ მოსეული ძაღლები მოეგერებინა ქალბატონისთვის. ციკო მიდიოდა გულის ძგერით და, რაც უფრო უახლოვდებოდა ძალუა ნატალიას სახლს, აღტაცება უორკეცდებოდა. კარგა მანძილი ჰქონდათ გასაველელი.

სოფლის თავში გზა ბოლოვდებოდა და მოსჩანდა დიდი უზარმაზარი ბჰისკარი, რომელშიაც უნდა შესულიყვნენ. ქეთევანმა როდის-როდის მიაწია და შედგა შესასვენებლად. დაღალვისგან გული ასდი-დასდიოდა, სულს ძლივს ითქვამდა. ციკო უცდიდა დიდედას დასვენებას და პირდაპირ გაიყურებოდა.

თვალ-გადუწვდენელი ეზო დაფენილი იყო მწვანე ხავერდით, ერთ გვერდზე გაველოთ მესერი, რომელსაც იქვე ჩამოუდიოდა ჩანჩქარით პატარა რუ. შიგ პაწაწა ნავებივით სკურავდნენ ბატები. ქვიტკირის კედელზე ასულიყო ფარ-

შევანგი, გაეშალა მარაო-ბოლო და გაჰკიოდა რაღაცეა. ცაში, თითქო მასპინძლებს აუწყებს, სტუმარი მოგდითო. ძირს დედამიწაზე, რუს პირად, მოლს დაჰკროდნენ მწვანე ქუეები, რომელნიც ის ის იყო ამოსულიყვენენ წყლიდან. ფრთებზე შენარჩუნებული ცვარები მარგალიტებივით დასხმოდნენ, თავს ილაშაზებდნენ შხის სხივებზე.

სახლის მაღალი გადაყვანილი თაღები ძველებურ სახლპრო მხარეში იტაცებდა ციციოს.

დღედამ მოიკრიფა ღონე და გასწია. აგერა შეიარეს ეზო, აივანს მიუახლოვდნენ, სადაც ვრძელი მაგიდა იდგა. მის წინ ტახტზე მხარ თეძოზე წამოწოლილიყო როსტომი და ცისფერი თვალები მიემართნა სივრცისთვის, მაგრამ, დაინახა თუ არა მიმავალი ქეთევანი, საჩქაროდ წამოვარდა და წინ მიეგება.

— მობრძანდით! — წარმოსთქვა მან და მოიხედა ოთახებისკენ, საიდანაც ეგონა ნატალია გამოვიდოდა.

ქეთევანი ჩამოჯდა ტახტზე დასასვენებლად, ციციოც მას მიეყუთა. ნატალიამ დიდხანს არ ალოდინა, ბოდიშებით გამოვიდა, დავიგვიანეო და მოუჯდა ქეთევანს.

— ჩემი მაზლი როდის მობრძანდება? — ჰკითხა ნატალიამ.

— იწერება, საქმეების გამო ამ თვის გასელამდის ვერ მოვალო, — უპასუხა ქეთევანმა და ნაღვლიანის თვალებით შეხედდა ორივე ცოლ-ქმარს, რომელნიც კმაყოფილებით იყურებოდნენ.

— დღეს ჩემს ლევანსა და ელენეს მოველი. მინდოდა მე თვითონ წავსულიყავი მოსაყვანად, მაგრამ ვერ მოვახერხე და ჩემს ლევანს მივწერე ქალაქში, ამომიყვანე მეთქი. ერთ დღეს მოახერხებს ამორბენას. შენა, ციციო, რატომ აგრე გვიან-გვიან გვანახავ ხოლმე? — მიუბრუნდა ნატალია ციციოს, რომელიც იღიმებოდა. ამ დროს კარებზე მოგრილდა ეტლი, საიდანაც გადმოხტა სამხედრო ტანისამოსში გამოწყობილი ახალგაზდა, რომელმაც ხელი მიაწოდა ყმაწვილ ქალს.

— ელენე! — შეჰკივლა ნატალიამ და მივიარდა შენს
 ელენე ჩაეკრა დედას გულში, შემდეგ მამას მოეხვია და ბო-
 ლოს ქეთევანს გულზე აკოცა.

— ციკო, აქა ხარ? — გაისმა წკრიალა ხმა ელენესი და
 ალტაცებით დაეკონა პატარა ქალს. ელენე მამასა ჰგავდა.
 ისეთივე მშვენიერი ლურჯი თვალები ჰქონდა, თეთრ-ყირ-
 მიზი ნაკვთები. თავისებური ქალური ნაზი იერი კიდევ უფრო
 იზიდავდა მნახველს. მის შუატანს მოხდენით გამოსწყობო-
 და ცის ფერი კაბა. სადილი აივანზე გაიშალა, ელენემ გვერ-
 დით მოისვა ციკო და განუწყვეტლივ უაღერსებდა. ლევა-
 ნიც გათამამდა და დაუწყო ხუმრობა ელოსა და ციკოს. სა-
 დილ შემდეგ, ლევანს კარებზე მოადგა ისევ ოთხ ცხენ შებ-
 მული ეტლი, რომელმაც საჩქაროდ გააგრილა ყმაწვილი
 კაცი სადგურისკენ. ელომ-კი ხელი მოჰკიდა ციკოს და წაი-
 ყვანა ბაღში — ელენე ჩაჯდა ხეებ შუა გაბმულ ბაღეში და
 დაიწყო ოღნავ რბევა. ციკოც იქვე ახლო ჩამოკუცქდა და-
 ბაღ ხის ტოტზე და ელენეს შესცეცებოდა.

— ციკო, მაშ შენ სულ ამ სოფელში ხარ? არსად წა-
 სულხარ? ნუ თუ არა გწყინდება ერთ ადგილს ყოფნა? —
 ეკითხებოდა ელენე.

— არა, ელო, მე აქ ძალიან კარგადა ვგრძნობ თავსა.
 პატარა კატოსთან ვთამაშობ, წიგნებს ვკითხულობ. ზაფხულ-
 ში ხანდისხან დავდივარ მინდვრებსა და ბაღებში, თუმცა-
 კი... — აქ შესწყვიტა ციკომ ლაპარაკი და ნალვლიანად გვერ-
 ლზე გაიხედა.

— თუმცა რა?.. — მიიტანა ელომ და მოუმატა რხევას.

— დიდება არსად მიშვებს.

— რატომ? ჰაერზე ყოფნა ძალიან სასარგებლოა მეტა-
 დრე სოფელში.

— დიდება კი ამბობს, სახლში უნდა იყოვო.

— აი, მე მოვედი, ციკო, შენც სულ ჩემთან გამყოფებ.
 მე შენ გაჩუქებ სხვა და სხვა ნახატებიან წიგნებს! — ელენემ
 აღერსით თავზე ხელი დაუსვა



— გასწავლი რუსულს, ფრანგულს... მე შენ მისწავლი მომწონხარ. — უთხრა ელომ.

— მეც მომწონხარ... მიყვარხარ .. დაიწურაჲლა ონდაე ციკომ, ყურებამდის გაწითლდა და დარცხვენით თავი დახარა ძირს.

VIII

ციკოს ცხოვრება შეიცვალა. გათენდებოდა თუ არა დილა, მოგონება აღარ უნდოდა, საჩქაროდ ჩაიცვამდა, პირს დაიბანდა, ჩაის დალევდა და გასწევდა ელენესკენ კმაყოფილი. დიდდღასაც გულში შვება ეძლეოდა, რომ ამისი ციკო გაუნათლებელთა სიაში არ მოექცეოდა და ხელს უშართავდა ბავშვს, რომელიც დღე და ღამე, ელენეთი მოხიბლული, სულიმის გონებაში იყო. რაც ელენე მოვიდა, ქეთევანი გრძნობდა, რომ იმას აღარ ეკუთვნოდა შვილი-შვილი, რომელიც თითქო გაურბოდა განზე. პავლეც აგვიანებდა სახლში დაბრუნებას და მოხუცებული რჩებოდა მთელი დღეები თავის აბრეშუმსა და თითქასთან ერთად. ციკო ყურადღებას არ აქცევდა ამ გარემოებას და ელენესკენ მიისწრაფოდა. ელენეც ყოველთვის აღერსით უხვდებოდა. შეიყვანდა თავის ოთახში, მოუჯდებოდა გვერდით და ასწავლიდა. ხანდისხან, როდესაც ნატალია დიასახლისობაში იყო გართული, როსტომი მინდვრად წავიდოდა ბულულების დასათვალიერებლად, ელენე აივანზე გამოიყვანდა ბავშვს, მაგიდასთან დასხდებოდნენ და მეცადინეობდნენ. მოხდებოდა ხოლმე, რომ ელენე და ნატალია კვირის-კვირობამდის წავიდოდნენ სადმე სტუმრად, მაშინ ციკო ისევ ბრუნდებოდა სახლში და ასწავლიდა პატარა კატოს. ელენე დიდ მუყაითობას იჩენდა სახლში, ცდილობდა ნატალიას უკან არ ჩამორჩენოდა და არას დროს უსაქმურად არ დარჩებოდა. ციკო გაფაცოცებით უყურებდა თავის მასწავლებელს, თვითვეულ მის მოქმედებას და მისს გავლენის ქვეშ ესეც შეუმჩნევლად იზრდებოდა, ვარდის კოკორივით იფურჩქნებოდა. ორ წელიწადში ციკომ დაიწ-



ყო რუსულად თავისუფლად კითხვა და ცოტა ზეპირად მკითხველად მხიარულადა გრძობდა თავს როსტომისას. ციკო ბუნებით მხიარული და სიცოცხლით სავსე იყო, გულ-უბრიყვილო სულ კისკისებდა და თავისუფლად ფრთებსა შლიდა. როსტომს და ნატალიას ძალიან უყვარდათ ეს უმანკო არსება და შვილებში არ არჩევდნენ. მაგრამ ციკოს უზრუნველობა ისევ დაიჩრდილა, როსტომის ქალი ელენე დაინიშნა სვიმონ ძალვანაშვილზე და ციკოსთვის ველარ იცლიდა. ყველა საქორწილოდ ემზადებოდა, ციკო დაუბრუნდა დიდედას, რომელმაც კმაყოფილებით გაულიმა და ჩაუჯდა წიგნების კითხვას; ხარბად კითხულობდა და თავს დავიწყებას აძლევდა, მარტო ისევ კატო იყო ამის მოწყენილობის გამქარვებელი; ისიც ხშირად მოდიოდა და ცდილობდა გაერთო.

— დიდედა, ნუ თუ აქედან სამუდამოდ უნდა წავიდეს ელენე? როგორ მენანება!.. ვერ გამიმეტებია! — შესძახა თვალკრემლიანმა ციკომ და მოხუცებულს მოეხვია.

— რა უყოთ, შვილო, თვითონ ხომ კმაყოფილია?

— მოშორდეს ყველას? დედმამას? მეგობრებს? ოჰ, არა, მენანება, ძრეულ მენანება, დიდედა! ვერ დავთმობ! — ქვითინებდა ციკო სწორედ იმ დროს, როდესაც ელენე იდგა თავის ოთახში სარკის წინ და თავზე ყვავილების გვირგვინს ადგავდნენ, სადედოფლოდ აწყობდნენ. ეზო და სახლი სტუმრებით ავსილიყო, ციკოც უნდა წასულიყო ქორწილში, მაგრამ გული უკვნიოდა. დიდედასაც კრემლები შორეოდა თვალეებში, თავზე ხელს უსვამდა შვილიშვილს, რაღაც ფარული სევდა უკრთოდა სახეზე.

ანასტასია ერისთავ-ხოშტარია.

(დასახრული იქნება)



ტ ი რ მ ლ ა.

(ლეგენდა)



ამე იყო, პირველი ღამე ადამ-და-ევას სამოთხიდან გამოდევნის შემდეგ. ვარსკვლავნი, რომელნიც მზის მაგივრობას ეწეოდნენ ღამით, ცის სივრცეში გადამალულიყვნენ და შემოქმედის მიერ დაწყევლილი დედამიწა წყვდიადს მოეცვა, მხოლოდ ედემის არე-მარე ღაღღადებდა: იქ, სამოთხის კარებთან, მთავარანგელოზი იღგა ცეცხლის მახვილით და ცხოვრების ხესთან აღარავის აქაჰანებდა.

განდევნილები შორი ახლო ხეებ ქვეშ მიკუნქულიყვნენ და სასოწარკვეთილებას ეძლეოდნენ. ჰგრძნობდნენ, რომ ღვთის წინაშე დამნაშავენი იყვნენ და სვინიდილი ჰქენჯნიდათ; აგონდებოდათ დაკარგული ნეტარება და გული უღონდებოდათ, სულ-მოკლეობით ერთმანეთს აბრალებდნენ ამ უბედურებას, ხან საცოდავად ჰგმინავდნენ და ქვეითინებდნენ, ხან უზენაესს ემუდარებოდნენ ცოდვების მოტევებას. სციოდათ; შიმშილი ცალკე აწუხებდათ, უძილობა — ცალკე; არ იცოდნენ, სად გამთბარიყვნენ, ან თავი სად მიედრიკნათ, ან როგორ გამაძლარიყვნენ.

ქვეყნიურნი ქმნილებანი, უწინ დედამიწის მბრძანებლების ყურმოჰკრილი ყმანი, ახლა მტრად გადაჰკიდებოდათ, რად-



გან სხვათა შორის ისინიც დაიწყებულნენ ადამ და ევას ზიით. ამიტომ, პირველ ადამიანებს მოსვენება აღარა ჰქონდათ აუარებელ მწერებისაგან, რომელნიც ირგვლივ მუქარით დაბზუოდნენ, შხამიან ქვეწარმავალისაგან, რომელიც იქვე საზიზღრად დაცურავდა, ტურებისა და ლომებისაგან, რომელნიც ყოველ მხრიდან საზარლად აყმუოდნენ და ღრიალებდნენ.

*
* *

ქვეყნიურ ქმნილებათა შორის მხოლოდ ფრინველები არ გასდგომიან პირველ ადამიანებს. ის ფრინველები, რომელნიც შექმნისათანავე დაჯილდოვებულ იყვნენ სიმღერის ნიჭით, ყოველ მხრიდან მოფრინდნენ და მთელ ღამეს სიმღერა-გალობა არ შეუწყვეტიათ, — გამწარებულებს ნუგეშსა სცემდნენ. უსტვენდა ბუღბული, გალობდა კიოტა, მღეროდნენ დანარჩენი ფრინველებიც. მოფრინდა იმ ალავას დაუზარებელი ტოროლოც. ფანცქალა გული ჯავრით ევსებოდა, ადამ და ევას რომ ამ ყოფაში ჰხედავდა, მაგრამ ამხანაგებთან ერთად თავისი თანაგრძნობა ვერ გამოეთქვა სიმღერით, რადგან გამჩენმა არ დააჯილდოვა მუსიკალურის ნიჭით. ამიტომ რტოდან რტოზედ გადახტებოდა და საცოდავად წრიპინებდა.

*
* *

ვათენებისას სიმღერით დაქანცული ფრინველები გაჩუმდნენ და თავთავიანთ ბუდეებს მიაშურეს. არ გაფრენილა მხოლოდ ტოროლო და საცოდავის წრიპინით რტოებს ედებოდა. როდესაც მზემ ამოაშუქა და გამოღვიძებულმა ფრინველებმა ხელახლად სიმღერა მორთეს, ტოროლომ ვეღარ აიტანა თავისი უსარგებლობა; აფრინდა მაღლა, ძალიან მაღლა, რომ იქ, გამჩენისათვის ეთხოვნა გალობის ნიჭი სასოწარკვეთილ ადამიანების ნუგეშსაცემად.



შემოქმედს ძალიან მოეწონა ტორიდას ასეთი უკანგრო და მცირე თხოვნა და დაასაჩუქრა სიმღერის საუცხოვო ნიქით, ისეთის ნიქით, რომელიც არც ერთს ფრინველს არ მოეპოვება: მართლაც და, აბა, რომელ ფრინველს შეუძლიან განუწყვეტლივ იგალობოს და თან კამარები აკეთოს, თითქოს ცასა და დედამიწას ეტრფიალებდნენ!

* *

ამ დღიდან, როგორც კი მზე ამოვიდოდა და პირველი ადამიანები აუტანელ მუშაობას მიჰყოფდნენ ხელს, თან აჰყვებოდა ტორიდაც. კოპწიად ჰაერში დასცურავდა და თან საუცხოვოდა მღეროდა. ადამ და ევა მუშაობდნენ და ტორიდას ყურს უგდებდნენ. გონებას მწუხარება აღარ უჩრდილავდათ და თვალეზზედ ცრემლები აშრებოდათ; გაუხარელ ცხოვრების სიმწარე ნელ-ნელა უქარწყლდებოდათ და მომავალის იმედით გული ევსებოდათ.

* *

დღემდე ეს საყვარელი ფრინველი ადამიანს ემსახურება: მგალობელთა შორის იგი პირველი მოფრინდება ხოლმე ცხელ ქვეყნებიდან და თან სასიხარულო ამბავი მოაქვს, „გაზაფხული დგებაო“; დილიდან საღამომდე თავს დასტრიალებს მინდორ-ველებსა და განუწყვეტლივ საუცხოვოდა გალობს.

ამბობენ, ადამიანის ბედნიერების საიდუმლოება მამა უფალმა ტორიდას სიმღერაში ჩამალაო; სწორედ ამიტომ მღერის ტორიდა ასეთ მაღლობსა და გაშლილ ადგილებში ყველასათვის გასაგონადო და დედამიწაზედ სასუფეველი ქეშმარიტებისა და კეთილისა მაშინ დამყარდება, როდესაც ხალხი ტორიდას სიმღერას შეიგნებსო.

ამიტომ ხომ არ არის, რომ როდესაც მინდორი ათასფრად აყვავდება და ყანები ზღვასავითა ღელავს, ჰაერში ტორიდა დანავარდობს და თან საუცხოვოდა მღერის, — ამიტომ



ხომ არ უხარიან ასე ხალხსა და გულოდან რაღაცა ღირსეული
შორდება; გინდა, რომ იმ დროს ვისმეს მოეხვიო, სააღერსო
სიტყვა უთხრა, რაიმე კეთილი საქმე უყო?!

და როდესაც შენც, ჩემო მკითხველო, გულს დარდები
მოგაწვეს, მინდვრებში-კი ყველაფერი ათასნაირადა ჰყვოდეს,
ყური დაუგდე ტოროლას და შენც იგრძნობ შეებას!..

ფ. კ—შვილი





დიდებას მაკიეგელი.

II

(შენდეგი)



ადადგა ჯაფარი მეოცე წელში და ფიქრი დიდის და სახელოვანის საქმისა მოსვენებას არ აძლევდა. იყო განათლებული, ნიჭიერი და საოცარის სიმარდიოა და ღონით დაჯილდოვებული; იმაზე უკეთესი მხედარი და მოისარი არავინ იყო მთელს ქალაქში.

— სახელი, პატივი, დიდება! — ჭურჭულებდა ყრმა და თვალები ცეცხლებრ ენთებოდა.

და, აი, შემთხვევამაც ხელი შეუწყო. იმათის ქვეყნის ხალაფამ ომი დაიწყო მეზობელ სახელმწიფოებთან. საუკეთესო წინამძღოლნი ხალიფასი ბრძოლის ველზე იქმნენ განგმირულნი და გამარჯვება მოწინააღმდეგესა რჩებოდა.

ჯაფარმა გადასწყვიტა, დადგა ნეტარი დრო სახელისა და დიდების მოხვეჭისაო და სთხოვდა მამას, ნება მომეცი, ომში წავიდეო.

— დიდებული და სახელოვანი დაგბრუნდები, მამაჩემო, — ეუბნებოდა ჯაფარი გამოთხოვებისას.

მოხუცი წყნარის, ნალვლიანის თვალებით აცილებდა შვილს.

გავიდა სამი წელი. ომი გათავდა. ჯაფარის თავგანწირულმა ბრძოლამ გამარჯვება ხალიფას არგუნა და ჯაფარიც სახელოვანი შეიქმნა: დაიპყრო ქალაქები, ტყვედ წამოიყვანა მეომრები. ამ გამარჯვების წყალობით ხალიფას სამეფოს საზ-



ღვრები გაფართოვდა და დაპყრობილი ქალაქები მოკვალენი იყვნენ ხარჯი ეძლიათ.

გათენდა დღე დიდებულის მოსულის მცხოვრებთათვის. ომიდან დაბრუნდა სახელოვანი წინამძღოლი ჯარისა. ქალაქის შესავალ კარებთან მოზღვავებული ხალხი გულის ძგერით და მოუთმენლად ელოდა ღირსეულ მამული შეილის შეხვედრას. გზა, რომელზედაც უნდა გაეგლო გამარჯვებულს გმირს, სურნელოვან ყვავილებითა და ძვირფასის საფენებით იყო მოფენილი. აი, გამოჩნდა კიდევ წყნარად მომავალი გუნდი მეომართა, რომელთაც წინ მოუძღოდა თეთრ ცხენზე მჯდომი ჯაფარი. ხალხი შეკრთა, აღელდა და ნეტარების ღიმილმა ვადაპკრა სახეზე. ერთი წუთიც დუმილისა და გაისმა გულის სიღრმიდან ამოხეთქილი ხმა ბედნიერებისა, ამოძრავდა, ერთი მეორეს ეცა და დასცა ყიყინა.

მოხუცი მაჰომედ-ალი არ გამოვიდა ქალაქში შეილის მისაგებებლად. ნურედინის მხარზე დაყრდნობილი თავისს სასახლის წინ ელოდა. ძმის ნათელი სახე მოუთმენელს სიხარულს გამოჰხატავდა, მოხუც მამისა-კი — სიმშვიდეს და სიდიადეს.

მიუახლოვდა ჯაფარი მამის სახლს და მსწრაფლ ჩამოხდა ცხენიდან. აღელვებულისა და გაბრწყინვებულის სახით მიეგება მამას. ყველა დადუმდა. გმირმა დაბლა მოიხარა თავი მამის წინაშე და, როდესაც მამა მოეხვია და ააყენა, ჯაფარმა ჩუმად ჰკითხა:

— მამავ, დიდებული ვარ თუ არა?

— არა, ჩემო შეილო, — ყრუდ ჩასჩურჩულა მოხუცმა.

არავის გაუგონია ეს სიტყვები, მაგრამ ყველამ დაინახა, თუ როგორ მოედრებლა ჯაფარს სახე და მოადგა ცრემლები მის თვალებს, იმ თვალებს, რომელთა მეტყველება მტერს შიშსა ჰგვრიდა და უკუაქცევდა; ისიც შეჰნიშნეს, რომ თავდალუნული მიუახლოვდა ცხენს, მოახტა და განაგრძო გზა მოლუშულმა და დაღონებულმა. აღარ ახარებდა ახლა აღარც ხალხის აღტაცება, აღარც ყვავილები, რითაც მისი სავალი

გზა იყო მოფენილი. მალე გაერცელდა ხმა, რომ დიდებულნი წინამძღოლი, ნუგეში სამშობლოსი, სადღაც უჩინრად გაჰქარაო.

III

რამდენისამე წლის შემდეგ, აღმოსავლეთის ერთ დიდ სამეფოში აღმოჩნდა ახალგაზრდა ნასწავლი, რომელმაც სულ მოკლე ხანში გაითქვა სახელი შესანიშნავის ექიმბაშისა. პირზე ყველას მისი სახელი ეკერა. საშინელის სენით შეპყრობილი მეფე იმან მოარჩინა და სიკვდილს გადაარჩინა. ამბობდნენ კიდესა, როდესაც მეფე შორჩა, ნება მისცა ექიმს, მომთხოვე, რა საჩუქარიც გინდა გულით, და მომირთმევიო. ექიმმა მოსთხოვა მეფეს ნაწილი ხრიოკ უდაბნოსი. შოიგონა ახალი საშუალება მიწის რწყვისა და განაყოფიერებისა. მალე მწირი და უსიკოცხლო უდაბნო გარდაიქცია ყვავილოვან წალკოტად და მისცა ხალხს შეძლება გამორჩენისა და მოსვენებით ცხოვრებისა. ხალხი წელში გასწორდა. თავზე ხელი მოისვა; აღიდებდა მხსნელს ჯაფარს და ბუნების მესაიდუმლედ მიაჩნდა. მაგრამ არავინ იცოდა, სადაური იყო ჯაფარი და ამიტომ ზეცით მოვლენილ მოციქულად სთვლიდნენ.

ერთხელ, ზაფხულის მყუდრო საღამოს, უბრალოდ ჩაცმული ახალგაზრდა კაცი შევიდა ქალაქ მოსულში. იპოვა მაჰომედ-ალის სასახლე და დააკაკუნა შესავალი კარები; როდესაც მოსამსახურემ გააღო კარი, ქაბუკმა სახე წამოსასხამით მოიბურა და სთხოვა, სახლის პატრონთან მიმიყვანეო. მოსამსახურე არ აპირებდა საეკვო უცნობის სახლში შეყვანას და მოიმიზეზა, სახლის პატრონს სძინავსო; მაგრამ ბოლოს დასთანხმდა ახალგაზრდა კაცს მტკიცე თხოვნას და შეიყვანა მაჰომედ ალის ოთახში. ღრმად მოხუცებული მაჰომედ-ალი სარეცელს იყო წამოწოლილი და ყავას მიირთმევდა. უცნობი გაჩერდა კარებთან და ჩვეულებრივ თავმდაბალი საღამო მიართვა მოხუცს. იმის ხმაზე მოხუცი შეკრთა.

— ჯაფარ, შენა ხარ?



— მე გახლავარ, — უპასუხა ჯაფარიმა.

— სად იყავ აქამდის? — წამოიძახა მამამ და გამოეშურა შვილისაკენ.

— ვეძებდი დიდებას და, აი, ვიპოვე კიდევ. ხომ გაგიგონია წარჩინებული ექიმი, ავადმყოფი მეფე რომ სიკვდილს გადაარჩინა? ისიც ხომ გაგივია, რომ ერთმა ნასწავლმა ხრიოკი და მწირი უდაბნო ნაყოფიერ მიწად გადააქცია? ის მე ვიყავ. მოველი შენთან არა ამოხრებელი ქვეყნისა, მომსვრელ მახვილით ხელში, არამედ განათლებისა და მშვიდობიანის ცხოვრების მღალადებელი. მთელი ხალხი ჩემს სახელს აღიდებს. მითხარ, გრწამს თუ არა ახლა ჩემი დიდება?

მოხუცმა ნაღვლიანად გადაჰხედა შვილს და ნელის ხმით, ხოლო მტკიცედ, უპასუხა:

— არა!

— არც ახლა! — წარმოსთქვა შვილმა, მამის პასუხით ზარდაცემულმა; ღრმად ამოიოხრა, მდაბლად თავი დაუკრა მამას, გამოვიდა გარედ და ისევ გულდაკოდილმა მიატოვა სამშობლო ქალაქი.

IV

განვლო კიდევ რამდენმამე წელმა. აღმოსავლეთის ყველა ქალაქში დიდის აღტაცებით კითხულობდნენ ახალ მწერლის ლექსებს. სახელი ძველის მწერლებისა გაჰქრა და დაიჩრდილა მის წინაშე ისე, როგორც ვარსკვლავები მზის სინათლისაგან. ყველგან გატაცებით კითხულობდნენ და ქება-დიდებით იხსენიებდნენ ჯაფარის სახელს; ვისმა სახელმა სამშობლო ქალაქამდისაც მიაღწია.

მოსულის ხალიფამ გაიგო თუ არა ეს ამბავი, ბრძანა მოეძებნათ სახელოვანი მწერალი და მოეწვიათ სასახლის მგონად. მეგრამ ჯაფარი იმალეობოდა და არაეინ იცოდა, სად იყო და სად არა.

ერთხელ, დილით ადრე, მაპომედ-ალის სასახლესთან მივიდა გამტვერიანებული, დაღლილ-დაქანცული ქვევითი კაცი

ჯოხით ხელში. თუმცა ღარიბულად ეცვა და მისუსტებულად დასახე ჰქონდა, მოსამსახურეებში მაინც იცნეს ჯაფარი. მიესალმნენ და შეიყვანეს ოთახში. აქ ჯაფარმა დაინახა, რომ მამა მზურვალედ ლოცულობდა კუთხეში. ესეთი ვითარებას წელში მოეხარა მოხუცი და სახეც დანაოკებოდა; მაჰომედ-ალიმ გადაჰხედა სიკეთითა და გონიერებით აღსავსე თვალებით და მიეგება შვილს ლოცვის გათავების შემდეგ. მოხუცს უნდოდა მოჰხვეწოდა, მაგრამ ჯაფარი დაემხო მუხლებზედ მამის წინაშე და მღელვარე ხმით ჰკითხა:

— აი, ისევ მოვედი შენთან, მამა ჩემო! წყურვილი განაჩენის მოსმენისა გულს მიწვავს. ჩემი ლექსები სულიერად ატკობს და ნუგეშსა სცემს ყველას, მდიდარსა თუ ღარიბს. სახელი ჩემი საუკუნოდ დალოცვილია, ჩემი ნაწერები არ გაქრება და ჩემს შემდეგაც ისევე დაატკობს ხალხს, როგორც ახლა ატკობს. მითხარი, გწამს თუ არა ჩემი ღიდება?

მოხუცმა ააყენა შვილი, მზურვალედ მოეხვია და წყნარად წარმოსთქვა:

— მენანები, შვილო, მაგრამ მაინც გეტყვი, რომ ვერ შეგიგნია ნამდვილი ღიდება!

— არა, ვპოვებ! — წამოიძახა ჯაფარმა.

— ის ღიდებას ვერ იპოვის, ვისაც გულის თქმით უნდა მისი პოვნა, — შენიშნა მამამ.

თავ-დაღუნული ჯაფარი გამოვიდა სასახლიდან და ისევ მიიმალა მშობელ ქალაქიდან.

ყ

განვლო ხუთმა წელმა. ერთს მთვარიან ღამეს მოხუცი მაჰომედ-ალი გამოვიდა აივანზე. ნაღვლიანად უყურებდა ვარსკვლავებით მოკაშკაშე ცას. დაბლა დაიხედა და შეჰნიშნა ვიღაც ადამიანის ლანდი, რომელიც მიმოვიდოდა სასახლის წინ და ისე კრძალვით აფათურებდა კედლებზე ხელებს, თი-



თქოს ვისიმე ვშინიანო. მოხუცი დააკვირდა უცნობს ჩემს შუა-
ნიშნა მის ტანზე დაძონძილი ტანისამოსი. მისმა ფეხშიშვე-
ლობაში და თავშიშველობამ დაარწმუნა მაპომედ-ალი, რომ
მგზავრი იყო ვინმე მწირი მეუღაბნოე. მაშინ მოხუცი დაი-
ხარა ძირს და გადასძაბა:

— მწირო, გაბედვით დაარახუნე! ჩემი სახლი მუდამ ღიაა
მგზავრისათვის, — დღისითაც და ღამითაც.

მწირს მოესმა ხმა თუ არა მოხუცისა, შეკრთა, აიხედა
მალა, რომ დაენახა მოლაპარაკე.

მთვარის შუქზე მამამ მაინც იცნო მთლად მიმკენარი და მი-
სუსტებული სახე თავის შვილისა.

— ჯაფარ, ჩემო შვილო!

— მამავ! — და მოისმა გულ ამოსკვნილი ქვითინი ჯაფა-
რისა. — მამავ მომხედვე: უარვყავ ყოველივე ამ ქვეყნიური: სიმ-
დიდრე, დიდება, სახელი. ყოველივე ამაოა! კარგად შევიგენ
ესა, და, აი, წიველ უღაბნოში და მხოლოდ ღმერთს ვან-
დობ ჩემს ფიქრსა და ზრახვას; იმას ვწირავ მთელს ჩემს სი-
ცოცხლეს. ვმარხულობ, მუდამ ვლოცულობ, თავგანწირვით
ვემსახურები ალლაჰს და მხოლოდ მისგან მოველი დიდების
გვირგვინს. უარვყავ ამ ქვეყნიური პატივი და დიდება და
შევიგნე, რომ ჩემის სიამაყის წყალობით უძღური და არარა
ვიყავ, და ახლა შეძახიან წმინდანს და ყოველის კუთხიდან
თავს იყრიან მოწაფენი ჩემს წინაშე. მაგრამ ყოველივე ეს არ
მახარებს და მხოლოდ შენს სიტყვას ვერწმუნები. მითხარ, მა-
მავ, მიგიხვდი თუ არა შენს აზრს? მივალწიე თუ არა ნამ-
დვილ დიდებას?

ჯაფარი დადუმდა და თრთოლვით ელოდა პასუხს. მო-
ხუცმა მოწყენით გადაძხედა შვილს და ბოლოს წარმოსთქვა:
რად გინდა ჩემი მოწონება, ჩემო შვილო! სვინიღისი შენი-
თვითონ გეუბნება, რომ შენ კიდევ ვერ გიპოვია გზა ნამდვი-
ლის დიდებისა, იმიტომ რომ ჯერ კიდევ ძლიერია სული შე-
ნის სიამაყისა და თვით მოყვარეობისა.



ამ პასუხმა ჯაფარს თავს ზარი დასცა, მიეყრდნობოდა და ყრულ ქვიფინი დაიწყო. მოხუცი აჩქარებული დაეშვა აივნიდან ძირს, რომ შვილი სახლში შეეყვანა; მაგრამ როდესაც ქუჩაში გამოვიდა. ჯაფარი უკვე თვალთ მოეფარა.

(გაგრძელება იქნება *)

ელო შანშიაშვილი



*) იხილეთ „ნაკადულის“ მე-10 №.



ლეო ტოლსტოის გარდაცვალებაზე.



არტო რუსეთმა? მთელმა ქვეყანამ
დაკარგა მამა, თვისი აღმზრდელი,
ვინაც მოპდინა ჩვენს გულ-გონებას
და ჩვენს ვნებათა უხვად ნათელი.

გაჩაღებულსა სულის ქურაზე
ახალს გრძნობასა და აზრსა სკედლ.
ადამიანთა სულის შემზუთველს,
დაუცხრომელად ხუნდებსა ჰკვეთდა.

მოხუცდა, მაგრამ იმისი გული
კაბუკისაზე ძლიერად სცემდა.


მან სიყვარული ჰაერად შეჰქმნა,
რომ მას ჰსუნთქავდეს სულ-დგმული ყველა;
ამაში არი ჯოჯობითისა
სამოთხედ შექმნის საღსარი, შეველა.
მაგრამ საიდან? როცა ჩვენს გულში
და გონებაში ჯერ ისევ ბნელა.

ეს მძლავრი სული, ზოგთაგან კრული,
მიმოჰქრის ეხლა ცათა სფეროში
და თავს აფარებს დასასვენებლად
თავის ღმერთისა კალთის ჩეროში...
ველარ იპოვოს მისებრი გვამი
რუსეთმა თავის სამფლობელოში!

დიღბანს და დიღბანს უნდა ლოდინი
კვლავ ამოუხდეს მას მზე ჩამქრალი;
დიდი დრო უნდა რუსეთის ერმა
შეიგნოს მისი მოძღვრების ძალი.
სულითამც იშვებს და გაიხარებს,
ვინც ჩვენს ცხოვრებას დაატყო კვალი,
კვალი ღრმა, დიდი, ვითა უფსკრული,
რომ იმის ფსკერსა ვერ სწვდება თვალი.
იქ აგროვია მარგალიტები,
აუარები ზურმუხტი, ლალი;
რომ ის მოჰხვეჭო არაფერს გარგებს
ხმალი და თოფი, ურიცხვი ჯარი.
ვინც სიყვარულით განისმქვალება
იმას ეკუთვნის, იმისი არი!

ვაჟა-ფშაველა.





ლევ ტოლსტოი.



ოქტომბრის 7-ს გარდაიცვალა რუსეთის მწერალი და ფილოსოფოსი ლევ ტოლსტოი. ლევ ტოლსტოი უკვე 83 წლის მოხუცი იყო. იმის გარდაცვალებამ დააღონა არა თუ მარტო რუსეთი, არამედ მთელი კაცობრიობის საუკეთესო მოაზრე ნაწილი. დააღონა იმიტომ რომ, ტოლსტოი იყო მეგობარი ამ კაცობრიობისა, ჭომაგი და მო-



სიყვარულე დაჩაგრულ მოძმისა, დაულალავი მძებნელისა, მარიტებისა, რომელსაც შეუძლია მოუპოვოს ყველას ბედნიერება, შეჭქმნას კაცთა შორის თანასწორობა და სიყვარული. მთელი თავისი ხანგრძლივი სიცოცხლე, თავისი დიდი ძლიერი ნიჭი ლევ ტოლსტოიმ ადამიანთა შორის სიყვარულის და თანასწორობის განმტკიცება-დამყარებას მოახმარა. ამისთანა ადამიანები ძვირფასია კაცობრიობისათვის და ამიტომაც არის, რომ ენანება და დასტირის მას თავს; ტოლსტოისთანა კაცმა რომ ათჯერ მეტიც იცოცხლოს, კაცობრიობისათვის მაინც კოტა იქნება და მაინც იგლოვებს იმის ამ ქვეყნისაგან განშორებას. იგლოვებს რადგანაც აღარ არის ის ადამიანი, რომელსაც ისეთის უნარით, ისეთის სიყვარულით, ყურადღებით და დახმარების სურვილით შეეძლო გულში ჩახედვა, მიგნება ნამდვილ სულიერ სატკივრისა, ნუგეშისცემა და შეღავათის მიცემა ტანჯულ ადამიანისთვის, ვინც უნდა ყოფილიყო—ქალი თუ კაცი, დიდი თუ პატარა.

სულით და გულით უყვარდა ტოლსტოის ბავშვები: თავის სოფელ იასნაია პოლიანაში, სადაც დაიბადა და სცხოვრობდა ამ ბოლო დროსაც, ერთ დროს სკოლაც ჰქონდა ბავშვებისათვის გამართული და ასწავლიდა თითონ. მთელ თავის სიცოცხლეში ბავშვებთან გატარებულ დროს, საუკეთესოდ გატარებულ დროდ სთვლიდა.

დიდებული ადამიანი, დიდებული მოაზრე და ქომაგი დაჩაგრულ მოძმეთა, ტოლსტოი ამბოლო დრომდის სცხოვრობდა თავის მდიდარ ოჯახში და იტანჯებოდა ამ შეუფერებელ ცხოვრებით. იმ დროს, როცა ირგვლივ ხალხი შიმშილს, სიცივეს და ათასგვარ უსამართლობა-გაჭირვებას განიცდიდა, ტოლსტოი თავის ოჯახში ხედავდა ფუფუნებას, უჭმბედნიერ ცხოვრებას და სწუხდა.

რამდენჯერმე განიზრახა და გადასწყვიტა განშორებოდა ამ ფუფუნებას და წასულიყო მშრომელ ხალხთან და



გაენაწილებინა იმათი სვე-ბედი, არა მარტო სიტყვით, არამედ საქმითაც, მაგრამ სხვა და სხვა მიზეზის გამო აქამდის ვერ მოიყვანა ეს სისრულეში და მხოლოდ 28 ოკტომბერს წავიდა თავის ოჯახიდან, თავის გულითადის სურვილის განსახორციელებლად. 83 წლის მოხუცი, მაგრამ სულით აღფრთოვანებული, მუდამ ახალგაზრდა, დაუღალავი ლევ ტოლსტოი წავიდა ახალ ცხოვრების დასაწყებად; იმ ცხოვრების, რომელიც შეჰქმნა თავის დიდებულ მოსიყვარულე გულში. წავიდა, მაგრამ იმის მოხუცმა სხეულმა ველარ გაუძლო მძაფრ ბუნების მოვლენას გაცივდა გზაში, ავად გახდა ფილტვების ანთებით და სადგურ ოსტაპოვოში (რიაზანის გბერნიაში) 7 ნოემბერს დილით გარდაიცვალა. იმის უკანასკნელი სიტყვები იყო მეგობრებისადმი, რომლებიც გარს ეხვივნენ ავადმყოფობის დროს: „რისთვის შეყრილხართ ყველანი ჩემთან, როცა ირგვლივ იმდენი უბედური ადამიანი იტანჯებაო.“ მხოლოდ ტოლსტოის შეუდარებელ მოსიყვარულე გულს შეეძლო სიკვდილის წამებში ამისთანა სიტყვების წარმოთქმა

სამწუხაროა ის, რომ ვერ განახორციელა თავის გულითადი საუკეთესო მისწრაფება. უნდა ვიგულისხმოთ, რომ იმის ცხოვრებაც ისეთი საყურადღებო, მშვენიერი და დიდებული იქნებოდა, როგორც იმის მწერლობა იყო. მაგრამ გინა ამნაირი მისი გარდაცვალებაც იმის მომასწავებელი არ არის რომ საუკეთესო ჩვენი სურვილები და მისწრაფებანი არასოდეს არ უნდა დავიხშოთ გულში და სამერმისოდ არ გადადვათ, რომ მხოლოდ ამ საუკეთესო სურვილის, მოძმეთა სიკეთისათვის შრომის დაკმაყოფილებაში შეიძლება ადამიანმა იპოვოს სრული ბედნიერება?

ოცდა ორი წლისა იყო ტოლსტოი, როცა სამწერლო ასპარეზზე გამოვიდა. იმისი პირველი მოთხრობა იყო „ბავ-



შეობა“, რომელიც მან დასწერა ჩვენს ქვეყანაში ყოფილი დროის და რომელიც ერთ საუკეთესო მშვენიერ მოთხრობად ითვლება იმის ნაწერებში. მას შემდეგ ტოლსტოის უკანასკნელ წუთამდისა ც-კი კალამი არ დაუგდია ხელიდან. სიკვდილის წინადაც-კი, როცა თითონ წერა აღარ შეეძლო, უკარნახებდა თავის აზრებს სხვებს და აწერინებდა. სამასამდის სხვა და სხვა წიგნი, მოთხრობანი, რომანი და ფილოსოფიური თხზულებანი აქვს დაწერილი და დაბეჭდილი. ჯერ დაუბეჭდავი და გამოუქვეყნებელიც ბევრი დარჩა. მთელის ქვეყნიერობის მოწინავე, მოაზრე ნაწილი გაფაციცებით ადევნებდა თვალ-ყურს იმის მწერლობას და ანგარიშს უწევდა ტოლსტოის გამოთქმულ აზრს. ყოველთვის საზოგადოებისათვის საყურადღებო საკითხებში საზოგადო მოღვაწეები პირველად ყველა ქვეყნიდან ტოლსტოის შეეკითხებოდნენ ხოლმე, ამა და ამ საკითხზე, რა აზრისა ხართო.

ყველა განათლებულ ხალხთა ენაზეა ტოლსტოის თხზულებები გადათარგმნილი. ქართულადაც არის, რასაკვირველია. „ნაკადულის“ მკითხველები არა ერთხელ და ორჯელ უსიამოვნებია ტოლსტოის ნაწარმოების წაკითხვას.

ვისაც ერთხელაც არის მიინც უნახავს ლევ ტოლსტოი, არასოდეს არ დააეიწყდება იმის კვიანი თვალეები, მოძრავი სახე, კეთილი გაშუქებული ღიმილი, თანაგრძნობით სავსე სიტყვები, რომლებიც საუკეთესო დამკვრელის თითებივით ეხებოდნენ თქვენის გულის სიმებს და საუკეთესო გრძნობებს და თვისებებს აღმოაცენებდნენ გულიდან. ამ დროს თქვენ გრძნობდით, რომ ძლიერი ადამიანი ხართ ამ ქვეყნად და შეგიძლიათ შეიტანოთ სიკეთე საერთო ცხოვრების ჰიმნში და ბედნიერი იყოთ, მხოლოდ გახსოვდეს-კი, რომ საერთო ბედნიერების გარეშე ბედნიერება არ არსებობს, თუნდაც შენ ყელამდის ოქრო-ვერცხლით იყო სავსეო,—გეუბნებოდა ამ დროს თქვენივე გული.

აი ასეთი ადამიანი, ასეთი ნუგეზის მცემელი და მასწავლებელი დაჰკარგა კაცობრიობამ.

9 ნოემბერს საღ. ოსტაპოვოდან სიგანგებო მატარებლით წაასვენეს და დაასაფლავეს იმის ცხედარი აუარებელი ხალხის თანდასწრებით იასნაია პოლიანაში, იმისი აზრი და მცნება დარჩა უკვდავი ადამიანთა შორის.

ნინო ნაკაშიძე.



დეკ ტოლსტოი და სოფლის ბავშვები.



ქვის გარეშა.

ბიგო ტფილისის ქართულ გიმნაზიაში სწავლობდა. სასწავლო წლის დამლევს ეგზამენი ჩინებულად დაიჭირა და მესამე კლასში გადავიდა. ამიტომ სოფელში ზაფხულს უფრო სიამოვნებით და მხიარულად ატარებდა თავის უფროს ძმა მიხასთან ერთად, რომელსაც იმავე გიმნაზიის კურსი უკვე დაესრულებინა და ახლა უმაღლეს სასწავლებელში წასვლას აპირებდა.

გიგოს სამშობლო სოფელს საღვინეთს ეძახდნენ; ეს სოფელი ერთ დიდ ხეობის ბოლოს იყო ვაკე ადგილზე გაშენებული. ირგვლივ საუცხოვო ბაღებით და ვენახებით იყო გარშემორტყმული. თვითონ ეს ხეობაც განთქმული იყო თავის სიკეკლუციითა და სილამაზით. სიგრძით დიდ მანძილზე იყო გაწოლილი მაღალ და კლდიან მთებზე. თავიდან ბოლომდის მთელ ხეობას პატარა, მაგრამ სწრაფი და გიემიეი მდინარე ჩამოუბრუნდა. მიხვეულ-მოხვეულ, ქვა-კლდიან კალაპოტში გველივით მიიკლაკნებოდა და აქეთ-იქით კალთებზე შეფენილ პატარა სოფლებს აცოცხლებდა და ახარებდა.

თითქმის მთელ ხეობაზე მდინარის პირად რკინის გზის ვიწრო ლიანდაგი გასდევდა. პატარა მატარებლების საშუა-



ქართული
საზოგადოებრივი
მეცნიერებათა
აკადემია

ლებით ამ გზით ხეობიდან ხე-ტყეს ეზიდებოდნენ ტარებლებს დაჰყავდათ მგზავრები; ასე რომ სულ რაღაც ორისამის საათის განმავლობაში მთელის ხეობის ნახვა შეიძლებოდა. აი, ამ მატარებელში ჩასხდნენ ერთ მშვენიერ დილას მიხა და გიგო და გასწიეს ხეობის სანახავად.

მატარებელი ქშენით და რაბრაზით ჯერ ვაკე ადგილზე მდინარის შორი-ახლოს მიდიოდა; მდინარის კალაპოტი აქ უფრო ფართოდ გადაქიმულიყო და წვრილის ქვით სულ მთლად მოქედილი იყო. შორს კი მაღალი, კლდიანი მთები მოსჩანდა, რომლის მწვერვალებზედაც დილის მზის სხივები ნახად, საამურად და თვალწარმტაცად ელვარებდა. მატარებელი მთებს დაუახლოვდა; რამდენიმე წამიც და შუა გაპობილ მთებ შუა გაძლიერებულის გუგუნით შეიქრა. გიგოს აღტაცებას საზღვარი არა ჰქონდა; მარჯვნივ და მარცხნივ თითქოს ცამდის ამაყად შემართულ ნაძვისა და ფიჭვის ტყით დაბურული მთის კალთები, კლდის ნაპრალებიდან გადმოწოლილ მიწიდან გადმოკიდული კლდის დიდი ნაქრები, რომლებიც თითქოს საცაა მოსწყდება და მატარებელს დაეცემაო, მატარებლის გაძლიერებული გუგუნით, რომელიც გაღმა-გამოდმა ყრუ გამოძახილს იწვევდა, მდინარის განუწყვეტელი შუილი, რომელიც თავის წმინდა წყალს ქვიდან ქვაზე აწყვეტებდა და შემდეგ ქაფ-მორეული თავქვე გაბრაზებული მიექანებოდა. გიგო მთლად სმენდა და ცქერად იყო გადაქცეული. მის თვალწინ სულ ახალ-ახალი, ერთი მეორეზე ლამაზი და კეკლუცი სურათები იშლებოდა, ჰქრებოდა, იშლებოდა, ჰქრებოდა. ხეობის ვიწრო სათავეს მიადწიეს. აქ მატარებელი გაჩერდა; გიგო ახლა კი გამოერკვა. მუშები გამოვიდნენ და ლიანდაგის აქეთ-იქით დაწყობილ გათლილ დიდ ხეებს დაუწყეს პატარა ვაგონეტებზე დალაგება. გიგო და მიხა-კი თავ-დაღმა ტყეში დაჰქანდნენ და მდინარის ნაპირს ჩავიდნენ. ერთხანს მდუმარებდნენ და, გარინდულ ტყის იდუმალებით აღტაცებულნი, ირგვლივ ყურადღებით იცქირებოდნენ.



გიგო დაეინებით დააშტერდა პირდაპირ მდინარეში. მით უზარმაზარ კეცივით აყუდებულ კლდე-ღრით სავსე მთას, საიდანაც ნაშალ ყვითელ კლდის ნატეხები, სილა მიწასთან ერთად თავქვე ნელ-ნელა მოიწვედა და ძირს პაწია მდინარის ვიწრო და ღრმა სადინელში ჩადიოდა. მთელ ხეობაში, როგორც მდინარეში, ისე მის ნაპირებზე ვეებერთელა კლდის ნატეხები და ლოდები ეყარა.

— მიხა, ე დამსხვრეული კლდე რად ჩამოდის მთიდან დაბლა ხევში, ან სადა გროვდება, სად მიდის?— ცნობის მოყვარეობით შეეკითხა გიგო თავის ძმას. გიგომ იცოდა, რომ მიხას ძალიან უყვარდა ასეთი შეკითხვები, და ყოველთვის სიამოვნებით იძლეოდა დალაგებულ პასუხს.

— მაგასაც გიამბობ, ჩემო გიგო,— დაიწყო მიხამ:— როდესაც წვიმა მოდის, მაშინ მისი წყალი სხვათა შორის კლდის ნაქვრეთებში, მის ნაპრალებშიაც ჩადის; ან კიდევ ნიადაგიდან ჩაეონავს. აი, ის წყალი აღბობს, კლდის ძირიდან ნიადაგს რეცხავს, დასაყრდნობ მიწას აცლის კლდის მოჩებილ ნაქრებს, რომელიც ერთი მეორეს სწყუდება და, ამგვარიდ, სხვა და სხვა სიდადის კლდის ნაქრებად ქცეული, თავქვე გამოობის. კლდის დაშლასა, დაფხვნასა და ნაქრებად დანაწილებაში წვიმას ეხმარება ქარიც. ზამთრობითაც იგივეა. ხომ იცი, ზამთარში წყალი იყინება; ყინულის ერთი შესანიშნავი თვისება ის არის, რომ გაყინვის დროს იზრდება. დიდდება და განზე იწევს. და, აი, როდესაც კლდის ნაქვრეთებში წყალი იყინება, მაშინ საშინელის ძლიერებით აწვება აქეთ-იქით კედლებს და მთლად კლდეს ყაშა-ყაშა ხეთქავს. მომზღვლეულ კლდის ნაჩებები შემდეგ ნაშალ სილა მიწასთან ერთად დაბლა მოგორავს, მოსრიალობს. აგერ, აბა, გახედე, რამდენი კლდის ნაჩებები ჰყრია; სულ ყველა ზევიდან არის მომზღვლეული და ჩამოგორებული. ამნაირად, განუწყვეტლივ ირღვევა და დაბლა ხეობაში დიდ და პატარა ნაქრებად ჩამოდის კლდიანი მთა, რომელიც აჟარებელ სიბ ქვას და კენჭებს იძლევა.



ამ დროს, თითქოს საგანგებოდ, ზვეიდან მოსწყდა კლდის ვეებერთელა ნაჩეხი, საშინელის სისწრაფით და რახარხით წამოვიდა ქვევით, რამდენსამე ნაქრად დასკდა და რახა-რუხით ძირს ხვეში ჩაიშალა.

გიგოს, ცოტა არ იყოს, შეეშინდა, უნებურად ძმას მოეხვია.

— აგერ, ესეც ჩემის ნათქვამის დასამტკიცებელი საბუთი, საგანგებო მაგალითი, — ღიმილით წამოიძახა გახარებულმა მიხამ და ძმას იქითკენ მიუთითა.

— მაშ, სიპ ქვას და კენკებს ასეთი მთა იძლევა?! მე როგორღაც არა მჯერა, მიხა, — ცოტა ხანს შემდეგ შეეკითხა გიგო.

— მაშ, შენ როგორა გგონია, ჩემო გიგო; სიპი ქვაცა და აუარებელი კენკებიც კლდიან მთის შვილებია; ასეთ ადგილას არიან დაბადებულნი. ვიამბობ, როგორ იბადებიან: ღიდის წვიმის დროს მთის, აი, იმ ნაპრალებში მოსკდება ხოლმე ღიდი ნიაღვრები, რომელიც დარუებული ღრიანცელით მოშუის დაღარულ სადინელში. ამღვრეული, ატალახებული და ქაფ-მოგდებული მორბის თავ-დაღმა და თან მოაქვს ყველაფერი, რაც-კი გზაზე ეღობება. ყველა ეს ნიაღვრები აქეთ-იქიდან, აი, ამ საერთო სადინელში გროვდება, რომელშიც ახლა ეს პაწია მდინარე მიჩხრიალობს. ყველაზე უფრო მრავლად ეს ნიაღვრები სხვა და სხვა სიდიდის კლდის ნაჩეხებს მიეზიდება, და ერთი-მეორის შეხლა-შემოხლით, შეჯახ-შემოჯახებით და რახა-რუხით მოახტუნებს, მოაგორებს. და, აი, ამ შეხლა-შემოხლის ერთი მეორეზე და კლდიან კალაპოტზე ხახუნის დროს მწვეტიანი და თხელი ნაპირები ემსხვრევა, თანდათან ილესება. ლიპდება, მაგრდება და მომეტებულ შემთხვევაში მრგვალდება...

ამ დროს გაისმა მატარებლის ქუივილი, რომელსაც აქეთ-იქიდან მთები თავისებურ გამოძახილით გამოეპასუხა. მიხამ და გიგომ ყურები სცქვიტეს. „არიქა, არ გაგვასწროს, ჩქარა გავიქცეთ“, შესძახა მიხამ და ორივემ მოჰკურცხლეს. მუ-

შეგს უზარმაზარ ხეებით უკვე დაეტვირთათ ვაგონები და დაეწყათ მუშაობა. შემსხდარიყვნენ და ლაზლანდარობდნენ, მიხამ და გიგომ ქას-ქასით მიიბრინეს, ის იყო დაუსხდნენ და თავ-დაღმა დაქანდა მატარებელიც.

— ჰო და იმას გეუბნებოდი, ჩემო გიგო, — კვლავ განაგრძო მიხამ, — რომ ნიაღვრისაგან აგორებული კლდის ნაჩეხები ერთმანეთზე და კლდიან კალაპოტზე ხახუნით თანდათან სიბ ქვებად და წვრილ კენქვებად იქცევა. აი, ის დიდი ლოდები, ხომ ჰხედავ, აქა-იქ რომ ჰყრია, აი, ის ლოდებიც კლდისავე ნაჩეხებია, რომელიც აზვირთებულ და აღვართქაფებულ წყალს თავ-დაღმა უგორებია, უგორებია, მაგრამ ბოლოს ველარ მორევიო და სათავეშივე დაურჩენია. ასეთი ლოდები კლდესაც ჰგავს და ქვასაც ემგზავსება, ერთის სიტყვით, ქვა-კლდეს წარმოადგენს. ქვევით და ქვევით-კი, აბა, დააკვირდი, გიგო, ეს ლოდები უფრო პატარავდება და თანდათან ნაშდილ ქვის სახეს იღებს. წვრილი ქვა და ქვიშა-კი სულ ქვევით მიაქვს წყალს, რადგანაც უფრო მსუბუქად მიეზიდება.

მატარებელი ვიწრო ხეობიდან გამოდიოდა. დიდი ლოდები ზევით ხეობაში დარჩა; ახლა აქა-იქ იშვიათად ხვდებათ. სამაგიეროდ, საშუალო სიდიდის ქვა მრავლად იყო მოფენილი.

— შე მაინც როგორღაც არა მჯერა, მიხა; მე ვფიქრობ, რომ ქვები თავის თავად უნდა იყოს გაჩენილი და არა კლდის ნაქრებიდან; ეს იქიდანაცა სჩანს, რომ ქვა მაგარია და მძიმე, კლდე-კი უფრო რბილი, მსუბუქი და ფხვიერი, — ექვეითა სთქვა გიგომ. მიხას სიამოვნებით სახეზე ნათელი გადასდიოდა, თვალები გაბრწყინებოდა და ხეობის მსუბუქ ჰაერს ხარბად ისუნთქებდა.

— მართალია, კლდესა და ქვას შუა აგრეთი განსხვავება არსებობს, მაგრამ ეს იმას არ ამტკიცებს, ვითომ ქვა თავის თავად იყოს გაჩენილი და არა კლდიდან. ფხვიერ და ნაშალ კლდის ნაქრებს წყალი ალბობს, რეცხავს, შლის, რი-

თაც ის იმღვრევა; წყალი მიწასთან ერთად არეულა ამის ქვევით შიაქანებს. აგერ მდინარის ნაპირებზე რომ ყვითლად დაღამული ტალახი მოსჩანს, ის დაშლილი, წყალში გახსნილი ყვითელი კლდეა.

— მე რომ შავი ლამიკ მინახავს? მაშ, ისიც ყვითელ კლდისაგან არის?—სიტყვა გააწყვეტინა გიგომ.

— შავი ლამი შავის კლდისა და მიწისაგან წარმოსდგება; არის თეთრი ლამიკ, რომელიც თეთრ კლდის და თეთრსავე მიწისაგან შესდგება. ასე რომ სხვა და სხვანაირი ლამი და თვითონ წყლის სხვა და სხვა ფრად ამღვრევა დამოკიდებულია იმ ერთი მეორისაგან განსხვავებულ კლდეებსა და ნიადაგზე, რომელზედაც მორბის და რეცხავს მდინარე. ამის გამოა განსხვავება თვით ქვებ შორის, რომლებიც ათასფეროვანია. ჰო, და ნაშალი კლდე წყალში ლამად იხსნება, მაგარი ნატეხები-კი ერთი მეორეზე შეხლა-შემოხლით უფროც მაგრდება და ამნაირად ქვებად იქცევა.

— მაშ, იქ საიდან-ლა გაჩნდა ქვა, სადაც მდინარე არ არის? შეეკითხა გიგო.

— სადაც ახლა ქვა მრავლად ჰყრია და მდინარე-კი არ არის, ეგ იმას მოწმობს, რომ წინად ოდესღაც ასეთ ალაგას მდინარე მოდენილა, ზევით ხეობიდან კლდე-ღრე უზიდნია და სიბი ქვები მრავლად მოუფენია, — უპასუხა მიხამ.

— ქვა როგორღა იზრდება, რად იზრდება; მე გამიგონია, წყალსა და მიწაში ქვა იზრდებაო; მხოლოდ, თუ ადამიანმა თვალი მოჰკრა, ის აღარ გაიზრდებაო, — კვლავ დაწყვეტინა ლაპარაკი გიგომ და ცნობის მოყვარე თვალები ძმას სიყვარულით შეინათა.

— ეგ ტყუილი გაგიგონია, ჩემო კარგო, — ღიმილით უპასუხა მიხამ, — ქვა არ იზრდება და არც შეიძლება რომ გაიზარდოს; ის ზომ ორგანიული საგანი, ან სულიერი არსება არ არის. ქვა, როგორც სხვა არა ორგანიული, უსულო საგანი, შეიძლება დაიმტერეს, დაიწვას, დაიშალოს და ნაცრად


იქცეს, მხოლოდ მისი ზრდა-კი წარმოუდგენელია. არსებისათვის არ იკვებება, არ მოძრაობს და, აბა, საიდან, როგორ უნდა გაიზარდოს?! ეგ ზღაპარი ერთი იმ მრავალ კრუ შეხედულებათაგანია, რომლებიც უსწავლელ ხალხში მრავლად არის გავრცელებული, — თავისი მოკლე სიტყვა ამით დააბოლავა მიხამ და ოქროს ფრად გაღალანებულ მთის ქოჩრებს თვალი მიაშტერა.

გიგო-კი ჩაფიქრებული იდგა და ახლად გაგონილზე ფიქრობდა: გონების თვალით კვლავ დასცქეროდა ახლად ნანახ მთის საუცხოვო სურათებს და ზედი-ზედ მიხერგულ ლოდებს და ქვებს, რომლების გაჩენის ისტორია ახლა ზედმიწევნით იცოდა.

კარგად იყო დაბნელებული, როდესაც ძმები სახლში მივიდნენ; გიგო აღტაცებით უამბობდა შინაურებს ახლად ნახულსა და გაგონილს.

ს. პარტენაშვილი.






სინათლე და მისი მნიშვნელობა.

(შემდეგი *)

ფევით ჩვენ გავიცანით ის სხივები, რომლებიც მთავარ-ღერძის პარალელურად ხედებიან ლუბას. ამათში გამოერევა; რასაკვირველია, ისეთი სხივიც, რომელიც მთავარ ღერძზედ გაივლის. ამგვარ სხივს ის თვისება აქვს, რომ არ ილუნება და პირდაპირ გადის ლუბის მეორე მხარეს. ამას გარდა, სხივები არა პარალელურად, დახრილადაც შედიან ლუბაში, და ზოგი იმათგანი ოპტიკურ ცენტრში გაივლის. ის დახრილად წამოსული სხივიც, რომელიც ოპტიკურ ცენტრში გადის, არ ილუნება მზგავსად იმისა, როგორც მთავარ ღერძზედ მიმავალი სხივი არ იმრუდებს გზას. ასეთ სხივს უწოდებენ გვერდის ღერძზედ მიმავალ სხივს, რადგანაც იმ ხაზს, რომელიც ასევე დახრილად გადის ლუბის ოპტიკურ ცენტრში, ჰქვია გვერდის ოპტიკური ღერძი, და სხივსაც ამ უკანასკნელზედ უძევს გზა (სურათი 9). როდესაც განათებულ საგნის, მაგალითად სანთლის ალის, ერთი წერტილის სხივები—ერთი პარალელურ მთავარ ღერძის აზ და მეორე გვერდის ოპტიკურ ღერძზედ წარმართული (მაშასადამე, არა პარალელ-




სურათი 9.

*) იხილე „ნაკადული“ № 10.



ლური მთავარ ღერძისა) ად —გამოვლენ ლუპიდან, პირველი, ესე იგი პარალელური, ფოკუსში გაივლის, მთავარ




სურათი 10.

ღერძს ჩაშორდება და შეხვდება გვერდის ღერძზე მიმავალ სხივს (სურ. 10) აქ ისინი ერთმანეთს გადაესვენებიან, გადასკრიან ერთმანეთს და შემდეგ ცალკ-ცალკე განაგრძობენ გზას. იმ ადგილას, სადაც აღნიშნული სხივები ერთმანეთს გადასკრიან, მარცხნივ მყოფი თვალი, გაშლილ სხივების გაუღენით, დაინახავს სანთლის ალის ზევითა წერტილს ა. ავილოთ ახლა ქვედა ნაწილი სანთლისა ბ. და მოვიტყეთ ისე, როგორც ზევით, ესე იგი წარმოვიდგინოთ ამ წერტილიდან ერთი მთავარი ღერძის პარალელურად მიმავალი სხივი ბმ და მეორე გვერდის ოპტიკურ ღერძზე ბზ. პირველი იმათგანი გაივლის ფოკუსში და წავა ზევით, მეორე-კი არ გაილუნება და შეხვდება პირველს. იქ თვალა დაინახავს ალის ქვედა ნაწილს ბ. ამგვარადვე შეგვიძლიან მივიღოთ ალის შუა ნაწილების (წერტილების) გამოხატულებაც და შევადგინოთ მთელი მისი სურათი. როგორც სურათზე სჩანს, ჩვენ ამ შემთხვევაში მივიღეთ თავუკულმა გადაბრუნებული გამოხატულება სანთლისა და ამასთანავე დაპატარავებული. თუ გავზომავთ სანთლის და მისი გამოხატულების მანძილს ლუპის ცენტრამდის, დავრწმუნდებით, რომ სანთელი იმყოფება ფოკუსის ორკეც მანძილს იქით, ესე იგი იმ მანძილს იქით, რომელიც ორჯერ უფრო შორს ახლავს ლუპის ცენტრს, სანამ ფოკუსი (სურ. 10 და 11), და მისი გამოხატულება-კი ფოკუსსა და მის ორკეც მანძილს შუა.


არის ისეთი შემთხვევებიც, როდესაც მივიღებთ გადატრიალბებულს და გადიდებულ გამოხატულებას საგნისას, გადაბრუნებულს და გაუდიდებულს, ე. ი. თვითონ საგნის ოდენ-

ნას, ან პირდაპირს და გადიდებელს, და არის კიდევ ისეთი შემთხვევაც, როდესაც სრულიადაც ვერ მივიღებთ ლუბაში გამოხატულებას,—ყველა ეს დამოკიდებულია იმაზე, თუ რა მანძილია ლუბასა და საგანს შორის.



სურათი 11.

გადიდებულ თავუკულმა გამოხატულებას მივიღებთ იმ შემთხვევაში, თუ საგანი მოვათავსეთ მთავარ ფოკუსსა და ფოკუსის ორკეც მანძილს შუა. ამის და ყველა შემდგენის ასახსნელად უნდა გამოვიყენოთ იგივე სხივები პარალელური და გვერდის ღერძზე წარმართული¹⁾ და იგივე მსჯელობა, რითაც ზევით ვხელმძღვანელობდით.




სურ. 12

ლოთ საგანი და მოვათავსოთ მთავარ ფოკუსსა და მის ორკეც მანძილს შუა (სურათი 12). ხატვის გასაადვილებლად ვიხმაროთ ისარი, რომ-

ლის წვერიც მის ზევითა ნაწილს გვიჩვენებს. ეს გამოხატულება გაკეთდა, როგორც სურათზე სჩანს, ფოკუსის ორკეც მანძილს იქეთ.

დავაყენოთ ახლა საგანი ფოკუსის ორკეც მანძილზე (სურ. 13). ლუბის მარცხნივ მივიღებთ იმავე მანძილზე და იმავე სიდიდის გამოხატულებას, როგორც თვითონ საგანია, მხოლოდ გადაბრუნებულს.




სურათი 13.

თუ მთავარ ფოკუსში დავაყენებთ საგანი (სურათი 14), მაშინ გამოხატულებას სრულიადაც ვერ მივიღებთ, რადგანაც ამ შემთხვევაში ამ მიზნისათვის აღებული სხივები პარალელ-


¹⁾ ამ სხივებს იმიტომ ვირჩევთ, რომ იმათი მიმართულება ლუბაში გაელის შემდეგ ჩვენ დანამდვილებით ვიცით.



ლოურად მიდიან (პარალელურია **აღ** და **ბზ**, აგრედვე **ბმ** და **აშ**) და ერთმანეთს სრულიადაც არ უახლოვდებიან, — მაშასადამე ისინი ერთმანეთს ვერსად ვერ გადასჭრიან და ამის გამო თვალიც ვერასფერს დაინახავს.



დაგვჩა კიდევ ერთი მანძილი, რომელზედაც შეგვიძლია მოვათავსოთ საგანი. ეს არის ადგილი ლუპსა და მთავარ ფოკუსს შორის (სურათი 15). პარალელური სხივი, მთავარ ფოკუსში გავლის შემდეგ, და გვერდის ღერძზე მდებარე სხივი



სურათი 15.

ზევითაც და ქვეითაც გაშლილად მიდიან **ბმ** და **აშ**, აგრეთვე **ბზ** და **აშ**, — ისინი თანდათან უფრო შორდებიან ერთმანეთს და ამის გამო ლუპის მარცხნივ საგნის გამობატულებას ვერ მოგვცემენ. მაგრამ,

თუ განვიგრძობთ იმათ ლუპის მარჯვნივ, ამ მხარეზე ისინი ერთმანეთს გადასჭრიან და ლუპის მარცხნივ მყოფი თვალი დაინახავს საგნის გადიდებულ და პირდაპირ გამობატულებას ლუპის იმავე მხარეზე, სადაც თვითონ საგანია (სურათზე სხივების მიმართულების გაგრძელება წერტილებითაა ნაჩვენები).

სხვა და სხვა გამობატულებათა მისაღებ ცდათა მოხდენა ადვილად შეიძლება (უმჯობესია ბნელ ოთახში), თუ გაქვსთ ლუპა, რომლის შექმნაც საკიროა ყოველ ცოდნის მოყვარე კაცისთვის, მით უმეტეს რომ ძალიან იაფია. ყველაზედ უწინ დაგვირდებით მთავარ ფოკუსის მონახვა, რომელსაც ასე იპოვნით: მიუშვირეთ ერთის გვერდით ლუპა მზის პირდაპირ სხივებს (მზის სხივებს პარალელური მიმართულება აქვსთ დაახლოვებით) და მეორე მხრივ მიუახლოვეთ მას ნელ-ნელა ქალაღდი. ერთ ადგი-



ლას ლუპის ახლოს თქვენ შეამჩნევთ ძლიერ განათებას. ტილს — აქ იქნება დაახლოვებით მთავარი ფოკუსი. დადგით ლუპა მაგიდაზედ და დანიშნეთ მთავარ ფოკუსის მანძილი ლუპის მეორე მხარეზედ. გაზომეთ ორი ასეთი სიგრძის მანძილი და ისიც დანიშნეთ — ეს იქნება ფოკუსის ორკეცი მანძილი. შემდეგ აიღეთ ანთებული სანთელი და მოათავსეთ ყველა ზევით ნახსენებ მანძილზედ რიგ-რიგობით. ლუპის მეორე მხარეზედ დაიკირეთ შესაფერ მანძილზედ — იქ სადაც ზემოდ ნათქვამისამებრ უნდა მიიღოთ გამოხატულება, ქალიღლი ან წიგნი (ამ გვარ ასაფარ საგანს ჰქვია ეკრანი). მაშინ ზევით მოყვანილ ცნობების სინამდვილეს ნათლად დაინახავთ. ყველა სურათის რიცხვი შეადგენს ოთხს, მაგრამ თქვენ მხოლოდ სამს მიიღებთ ეკრანზედ. ეკრანზედ მიღება შეუძლებელია იმ შემთხვევაში, რომელიც საგნის მხარეზედ კეთდება, და ამის გამო მას დაარქვენ ცრუ, არა ნამდვილი, ყოველ დანარჩენს კი — ნამდვილი გამოხატულება.

ცდა უფრო გაგვიადვილდებათ, თუ იშოვით სპეციალურად ამ მიზნისათვის მოშადებულს ან განგებ გააკეთებინებთ სახაზავივით ვიწრო ფიკარზედ, თანასწორ ნაწილებად დახაზულზედ, მოთავსებულ ეკრანს ა, ლუპას ბ და სასანთლეს გ (სურ. 16), რომლების გაწევ-გამოწევა და აწევ-დაწევა ადვილად შეიძლება. შეგიძლიანთ აგრედვე აიღოთ ლუპა და სხვა და სხვა სიშორიდან გაჰხედოთ საგანს, რომელსაც დაინახავთ, ზევით ნათქვამის თანახმად, სიდიდისა და სისწორის შეცვლით.



სურ. 16.

ლუპას მის ასეთის თვისებების გამო ხმარობენ მცირე საგნების დასანახავად (მცენარეების ნაწილების გასარჩევად, წვირულ ნაწერის წასაკითხავად და სხ.) და მაშინ მას უბრალო მიკროსკოპს უწოდებენ. ამ შემთხვევაში საგანი უნდა იყოს მოთავსებული ლუპასა და ფოკუსის შორის (სურ. 15).



შეიძლება კიდევ ორი ლუბა დავაყენოთ ერთი-მეორისგან ისეთ მანძილზედ, რომ გადიდებული გამოხატულება ხელ-მეორედ ვავადიდოთ, რის გამოც პატარა საგნები კიდევ უფრო დიდად გამოჩნდება, მაშინ ჩვენ გვექნება რთული მიკროსკოპი. იხმარება ლუბა აგრედვე სურათების გადასაღებად ფოტოგრაფიაში და, სხვა ოპტიკურ შუშებთან და სარკეებთან ერთად, სურათების გამადიდებელ ფარანში, შორეულ საგნების დასანახავ აპპარატებში— ბინოკლში, ტელესკოპში და სხვა.

იმ აპპარატებში დაუფასებელი სარგებლობა მოუტანეს ადამიანის ცოდნას, მის გონებრივ განვითარებას და კეთილდღეობას. ვის არ უგვრძნია განცვიფრება და სიამოვნება, როდესაც შორს საქვრეტ ლულის შემწეობით შორეული საგნები დაუნახავს ახლოს და გარკვევით; ვის არ აინტერესებს ფოტოგრაფიული აპპარატი, როდესაც რაღაც ბნელ ყუთის კედელში მოთავსებულ შუშის შემწეობით ვიღებთ ნამდვილ სურათებს საგნებისას და მათ შორის ჩვენსასაც! მაგრამ რა შესაადარებელია ასეთი განცვიფრება და სიამოვნება იმ გასაოცარ და დაუფასებელ სამსახურთან, რომელსაც კაცობრიობას უწევს მიკროსკოპი და ასტრონომიული აპპარატები! მიკროსკოპის შემწეობით ადამიანმა შეისწავლა მცენარეების და ცხოველების (მაშასადამე თავის საკუთარისაც) ორგანიზმის ქსოვილები და მათის ცხოვრების კანონები, დაინახა და გაიცნო უბრალო თვალთ უხილავი სხეულები— მიკროორგანიზმები. ციებისა, კლექისა, ხოლერისა და ბევრ სხვა ავადმყოფობის მიზეზი თვალთ უხილავი მიკროორგანიზმებია, და, რომ მიკროსკოპი არ იყოს, ვერც მათ გაიცნობდა და შეისწავლიდა ადამიანი და, მაშასადამე, ვერც იმ ბრძოლას გაუწევდა, რითაც ამჟამად დღეს თანამედროვე მედიცინა. მიკროსკოპის შემწეობით გაიცნო კაცმა ისეთი მიკროორგანიზმებიც, რომლებსაც მისთვის დიდი სარგებლობა მოაქვს, მაგალითად ღვინის დუღილის, კეფირის, მაწვნის, ძმრის გამჭენი სოკო-



მითტლბია

ბრძოლის ომი

ბრძოლის განახლება.



როადელების მთავარსარდალმა, მოსიშინა თუ არა ღმერთების მთავარის ბრძანება, დაუყოვნებლივ ბრძოლის ველისაკენ გაემართა. ძღვევა-მოსილი ჰექტორი ელვისავით თავს დასტრიალებდა ტროადელების რაზმებს და თვითოეულ მეომარს გულში გამარჯვების იმედს უწერგავდა. ჰექტორს ღრმად სწამდა ღმერთების მამათ მთავარის ზევსის სიტყვები და კადევაც ამიტომ ასე გაბედულად ეტანებოდა ბრძოლის ველს და სამკვდრო-სასიცოცხლოდ რაზმავდა თავის ძღვევა-მოსილ ჯარს.

ტროადელები და აქაველები კვლავ ერთი მეორეს თავდავიწყებით შეეჯახნენ. ასტყდა საზარელი ომი. დედამიწა ერთიანად ზანზარებდა. სისხლის ნიაღვრებმა მოარწყო ბრძოლის ველი; მაინც ორივე მოსისხლე მტერი იარაღს ხელს არ აშორებდა და თავდავიწყებით ერთი მეორეზედ იერიშით მიდიოდა. ელლინთა მთავარსარდალი აგამემნონი გაათურებულ ლომივით მძვინვარებდა ბრძოლის ველზედ და მუსრს ავლებდა ტროადელების ჯარის კაცებს. ტროადელების ძღვევა-მოსილი მთავარსარდალიც არა ნაკლებს სიმამაცით იბრძოდა და თავგამოდებულ მოსისხლე მტერს მამაცურად უმკლავდებოდა. საშინელებას განიცდიდა ბრძოლის ველი; ყველგან გმინვა და მწუხარება, ყველგან ვაება და თავგანწირული სიკვდილი.



ქვემოთადაც
საქართველოს
საქართველოს

აქველები გმირთა გმირის მძვინვარებას სახელობენ. აქონდა, იგი შეუბრალებლად ჰგმირავდა ტროადელების მეომრებს და სამუდამოდ სიცოცხლეს ასალმებდა. ანტენორის ძლევა-მოსილმა შვილმა იფიდამასმა ვერ მოითმინა ტროადელთა მეომრების ასე განადგურება და იშვიათის გაბედულობით ხელჩართულ ომში შეებრძოლა ელლინთა მთავარსარდალს აგამემნონს. მცირედის შებრძოლების შემდეგ, აქველების მთავარ-სარდალმა სასიკვდილოდ განგმირა ტროადელების სასახელო და თავგანწირული გმირი იფიდამასი. გამძვინვარებული აგამემნონი, ის იყო, იარაღს ხსნიდა სასიკვდილოდ დაკრილს იფიდამასს, რომ სრულიად შოულოდნელად თავს დაეცა აქველების მთავარ-სარდალს იფიდამასის ძმა კოონი და ისრით დასჭრა იდაყვ ზემოთ ძლევა-მოსილი აქველთა გმირთა გმირი. სისხლმა ნაკადულებრ გადმოსჩქეფა აგამემნონს კრილობიდან, მაგრამ მან იარაღი ხელიდან შინც არ გააგდო და ისევ გმირულად გამოუდგა უკან კოონს. აგამემნონმა კოონიც სასიკვდილოდ დასჭრა ისრით. აქველების მთავარსარდალი ისევ ძველებურის სიმამაცით იბრძოდა და ტროადელების რაზმებს მუსრს ავლებდა. როცა კრილობას ცოტათი პირი შეუშრა, აგამემნონმა მხოლოდ ახლა იგრძნო მწარე ტკივილები. კრილობა ისე მძლავრად აწუხებდა, რომ ბრძოლის ველზედ დარჩენა შეუძლებელი იყო. ამიტომ ელლინთა გმირთა გმირი დაუყონებლივ ჩაჯდა თავის სამხედრო ეტლში და ხომალდებისაკენ გაეშურა.

დაინახა თუ არა ტროადელების მთავარსარდალმა ჰექტორმა, რომ აგამემნონმა უკვე დასტოვა ბრძოლის ველი, თანხმად ღმერთების მამათმთავრის ზევსის სურვილისა, თავდავიწყებით გაილაშქრა მტრის წინააღმდეგ. ჰექტორის ბასრი ხმალი შეუბრალებლად ჰგმირავდა ელლინთა მეომრებს. მთავარ სარდალის სიმამაცემ ტროადელების მეომრებიც გაამხინვეა. ორივე მოწინააღმდეგე მტერი სამკვედრო-სასიცოცხლოდ შეებრძოლნენ ერთი მეორეს საბოლოოდ გასანადგუ-

რებლად. უმთავარსაარდლოთ დარჩენილი ელლინთა მხედრობა მეტად ცუდ მდგომარეობას განიცდიდა. ტროადელები თავდავიწყებით მიიწევდნენ ელლინთა რაზმების წინააღმდეგ და თითქმის ყველა თვალსაჩინო საფრებს და სიმაგრეებს ხელიდან აკლიდნენ. ელლინთა მხედრობა შეკრთა და შეშფოთდა. იგი თან და თან უთმობდა ბრძოლის ველს ტროადელებს და ხომალდებისაკენ მიიწევდა.

სწორედ იმ დროს, როცა ელლინთა მხედრობა მიუახლოვდა თავის ხომალდებს, ღმერთების მამათმთავარი ზევსი იდის მთაგრეხილზედ იჯდა და დაჰყურებდა ბრძოლის ველს. ზევსმა ახლა კი გადასწყვიტა, რომ ორივე მოწინააღმდეგე მხარე მხოლოდ თავიანთ ძალებს დამყარებოდა და თვითონ არავითარი მონაწილეობა არ მიეღო ომის ასე თუ ისე ბედის ვადასაწყვეტად. მართლაც, ზევსმა თავის გადაწყვეტილება სისრულეში მოიყვანა: მან თავისი ღვთაებრივი თვალები მოაშორა ბრძოლის ველს და ტკბილსა და ღრმა ძილს მიეცა.

ტროადელთა და ელლინთა რაზმები ისევ თავდავიწყებით ერთი მეორეს ებღებოდნენ და სამკედრო-სასიცოცხლოდ ერთი მეორეს არა ჰზოგავდნენ.

ტროადელებს ისევ ძველებურად იერიში იერიშზედ მიჰქონდათ და გამარჯვების იმედს გულში მხნედ ატარებდნენ. ზღვათა მბრძანებელს დიდებულს ღმერთს ჰოსეიდონს შეეცოდა ელლინთა რაზმები და გადასწყვიტა მიშველებოდა ამ უკიდურეს დროს მოსისხლე შტრის მოსაგერებლად. ჰოსეიდონ ღმერთმა დაუყონებლივ შეაბმევიანა ოქროს ეტლში თავისი ფეხ-მალე ოქროს ფაფრიანი ცხენები და ბრძოლის ველისაკენ გაეშურა. მიაღწია თუ არა ზღვათა მბრძანებელმა ბრძოლის ველს, დაუყონებლივ მკითხავის კალხასის სახე მიიღო და აქაველების მეომრებთან ერთად ჰექტორისა და ტროადელების წინააღმდეგ გაილაშქრა.

ელლინთა მხედრობის მთავარ-სარდლებმა უმაღვე იცნეს ჰოსეიდონ ღმერთი და ამიტომ მისის გამხნევებით უფ-

ერეკლესელის
მეტრის

რო მეტის გაბედულობით და სიმამაცით შეებრძოლნენ მეტრის ტროადელების რაზმები პოსეიდონ ღმერთის ბრძოლის ველზედ გამოსვლისთანავე შეშფოთდნენ და მეტრს ზურგი შეაქციეს. ელლინთა მხედრობა ყივინითა და ზეიმით კვალ და კვალ გამოუდგა უკუქცეულ ტროადელებს და გზა და გზა შეუბრალებლად მუსრს ავლებდა მოსისხლე მეტრს.

სწორედ ამ დროს ღმერთების მამათმთავარს, რომელიც ტკბილად განისვენებდა იდის მთაგრეხილზედ, გამოეღვიძა. ზევსი მეტად განრისხდა, როცა ბრძოლის ველზედ პოსეიდონ ღმერთი დაინახა. ღმერთების მამათმთავარმა დაუყონებლივ თავისი შიკრიკი ირისი გაუგზავნა პოსეიდონს და ბრძოლაში მონაწილეობის მიღება სასტიკად აღუკრძალა. პოსეიდონს მეტად ეწყინა ზევსისა ასეთი განკარკულება, მაგრამ ძალა უნებურად უნდა დამორჩილებოდა.

ღმერთების მამათმთავარმა ამის შემდეგ ბრძოლის ველზედ დაუყონებლივ გაგზავნა აპოლონ ღმერთი და დაავალი ტროადელებისათვის დახმარება აღმოეჩინა.

ტროადელების მხედრობას ბედმა გაუღიმა, როცა აპოლონ ღმერთი ბრძოლის ველზედ გამოჩნდა. ძღვევა-მოსილი ტროადელების მთავარსარდალი ჰექტორი თავის მამაცის მხედრობით ელვის სისწრაფით მეტრისაკენ გაეშურა და იერიში მიიტანა ელლინთა მხედრობაზედ. კვლავ განახლდა სამკვდრო სასიცოცხლო ომი. ელლინთა მხედრობა დამარცხებული უკუიქცა და ხომალდებს შეაფარა თავი. ტროადელები კვალდაკვალ მისდევდნენ მეტრს და ცეცხლის ალი დაატრიალეს თვით ხომალდებზედაც.

ა. მიქაბერიძე





შ ა რ ა ლ ა

პირველი ორი მარცვალი
საგნის თვისებას გვიჩვენებს,
თუ წყალი, ან და ჰაერი
ჩვენზედ გავლენას იქონებს;

თუ რომ ჩამოცხა, ან დაგვთბა,
მაგ თვისებისა ბრალია.
მგონი მიმიხედეს ის, ვინცა
მოფიქრებაში მალია.

მესამე მარცვალს არ უნდა
ძებნა მეტისა—მეტზედა:
ძალღს აჯავრებენ ბავშვები,
დიდი მიუსევს მტერზედა.

მთელი იქნება ქალაქი,
ქალაქად წოდებულია,
მტრისაგან ბევრჯელ ნაოხრი,
მთლად საქართველოს გულია.

რ ე ბ უ ს ი

ეროვნული
ბიბლიოთეკა

(წარმოღვენილი ანდ. ბაქრაძის-მიერ)



პ { თმის სა-
ღებავი }



„ 1
„
„
„ 100



3 „



თ



პ { თმის საღებავი }



მ-10 №-ში მოთავსებულ შარადის აღსნა:

ძმა კარგი და რიგიანი ღისთვის არის საქებარი.

რედაქტორი ნინო ნაკაშიძე. გამომც. თ. პ. ი. თუმანიშვილი.

ნაკადულის რედაქციაში და წ.-კ. საზ.

მაღაზიაში იყიდება შემდეგი წიგნები:

ზღაპრები, ვილჰელმ და იაკობ გრიმისა, ნაკადულის რედაქციის გამოცემა, ფასი . . . 30 კ.

სომხის თავ გადასავალი, თსულება, მარკ-ტუენისა, გამოცემა ნაკადულის რედაქციისა, ფასი 50 კ.

რას გვიამბობს ოთახი. თსულება ზვენა-რიუსისა, გამოცემა ნაკადულის რედაქციისა, ფასი 20 კ.

საქმას ფუძილურ სურსათეუგინანი შურსნული

ნაბუღუფი

წელიწადი VII

წელიწადი VII

გამოვა 1911 წელს იმავ პრეზრამით.

ფასი ფლიურად:

მოზრდილთათვის 12 წიგნი 3 მანეთი | (მცირე წლოვანთათვის 24 წიგნი 3 მან.
ორნივე ერთად მოზრდილთა და მცირე წლოვანთათვის 36 წიგნისა 5 მანეთი.

ნახევარის წლით ვინც გამოაწერს ორივეს ერთად—3 მანეთი.

ხელის-მოწერა მიიღება: * ნაკადუდი“-ს რედაქციამი გოლოვინის პროსპ. სპს. № 8

და წერა-კითხვის გამავრცელებელ საზოგადოების წიგნის მდარზიაში, სასახლის ქუჩაზე.



2610363-11
26101133